

INFO



Informativni časopis Općine Novi Grad Sarajevo | Novembar 2021. godina | Broj 28

Novo lice Novog Grada: Otvoren Centar za kulturu i edukaciju "Safet Zajko"



Usvojen Nacrt budžeta za 2022.
u iznosu od 43.122.000 KM

Počela sa radom dva nova vrtića

Rekonstrukcija i proširenje ulice
Džemala Bijedića






CENTAR SAFET ZAJKO

REKREACIJA, SPORT I EDUKACIJA



SADRŽAJ:

	Općinsko vijeće.....	4
	Kabinet načelnika.....	12
	Privreda.....	16
	Infrastruktura.....	18
	Obrazovanje.....	40
	Kultura.....	44
	Obilježavanja.....	48
	Ostale vijesti.....	55
	Civilna zaštita.....	56

TELEFONI ZA HITNE INTERVENCIJE:

HIGIJENSKI SERVIS
+ 387 61 22 99 40

DEŽURNI INSPEKTOR
+ 387 61 22 99 49

IMPRESUM:

IZDAVAČ:

Općina Novi Grad Sarajevo
Tel.+387 33 291 100, 291-313
E-mail: ngsa@bih.net.ba
www.novigradsarajevo.ba

AUTOR I UREDNIK:
GRAFIČKI UREDNIK:
FOTOGRAFIJA:

Amina Vatreš-Nezirević
Samir Kadić
Samir Kadić

VAŽNIJI TELEFONI I E-MAIL ADRESE

Služba za poslove Općinskog vijeća

033 291-130, fax. 033 291-271
vijece@novigradsarajevo.ba

Služba kabineta Općinskog načelnika

033 291-100 033 291-103; fax. 033 291-278
infonovigrad@novigradsarajevo.ba
ngsa@bih.net.ba
aminapress@novigradsarajevo.ba

Služba za privredu i lokalni ekonomski razvoj

033 291-122
privreda@novigradsarajevo.ba

Služba za urbanizam, imovinskopravne, geodetske poslove i katastar nekretnina

033 291-120; fax. 033 291-224
urbanizam@novigradsarajevo.ba
033 291-279
imovinska@novigradsarajevo.ba

Služba za opću upravu

033 291-233;
opcauprava@novigradsarajevo.ba
maticniured@novigradsarajevo.ba
cern@novigradsarajevo.ba

Služba za obrazovanje, kulturu i sport

033 291 117
033 291 281; fax. 291 170
obrazovanjeirazvoj@novigradsarajevo.ba

Služba za boračka pitanja, rad, socijalna pitanja i zdravstvo

291-237; fax.291-164
boracka@novigradsarajevo.ba
033 291-173; fax. 291-173
radisocijalnapitanja@novigradsarajevo.ba
291-306; fax.291-281

Služba za investicije i infrastrukturu

033 291-116
investicijeikomunalno@novigradsarajevo.ba

Služba za finansije

291-234; fax.291-319
finansije@novigradsarajevo.ba
ngsafin@bih.net.ba

Služba za zajedničke poslove

033 291-107
sacira@novigradsarajevo.ba

Služba civilne zaštite

033 291-114
cz@novigradsarajevo.ba

Služba za lokalnu samoupravu

033 291-344
mz@novigradsarajevo.ba

Služba za inspekcijske poslove

inspekcija@novigradsarajevo.ba

Pravobranilaštvo Općine Novi Grad Sarajevo

033 291-162
pravobranilastvo@novigradsarajevo.ba



OPĆINA NOVI GRAD SARAJEVO

7. radna sjednica Općinskog vijeća Novi Grad Sarajevo



Općinsko vijeće Novi Grad Sarajevo održalo je 30. septembra, 7. radnu sjednicu na kojoj je razmatrano i usvojeno 12 tačaka dnevnog reda. Vijećnici su iznijeli brojne inicijative i pitanja vezana za rješavanje svakodnevnih problema građana Novog Grada u oblasti zdravstvene zaštite, saobraćajne infrastrukture, rješavanja problema saobraćaja u mirovanju, sanacije klizišta, sigurnosti građana i sl.

Razmatrana je aktuelna problematika u oblasti primarne zdravstvene zaštite, s obzirom na svakodnevne pritužbe građana na loše funkcionisanje zdravstvenog sistema, posebno kada su u pitanju ambulante porodične medicine.

Zamjenik predsjedavajućeg Općinskog vijeća Novi Grad Sarajevo Abel Baltić, koji je od 1. septembra ove godine preuzeo dužnost generalnog direktora Javne ustanove "Dom zdravlja Kantona Sarajevo", kazao je da je dolaskom na mjesto direktora u JU DZKS zatekao stanje koje se može definisati kao kadrovski desetkovana javna ustanova, istakavši da JU "Dom zdravlja KS" ima registrovanih oko 208 timova porodične medicine. Taj broj od 208 timova porodične medicine, trebao bi imati 208 porodičnih ljekara, isto toliko medicinskih sestara i pola od tog broja diplomiranih medicinskih sestara. Dodao je da imaju manje od 100 ljekara porodične medicine, te da od potrebnih 160 higijeničarki, radi manje od 100, a nedostaje više od 10 vozača.

18 ljekara opslužuje 60 ambulanti

"Pored DZ imamo i druge javne zdravstvene ustanove na federalnom nivou, koje se ne



uključuju nimalo intenzivno, čak ni u svom punom kapacitetu u pružanju zdravstvene zaštite svojim osiguranicima, tu mislim na Medicinu rada, na MUP-ovu ambulantu, ambulantu za zaštitu radnika u saobraćaju, svi njihovi pacijenti su prebačeni na JU "Dom zdravlja KS". Dom zdravlja, ima više od 60 ambulanti, koje opslužuje 18 ljekara, imamo troje specijalista školske medicine, ne postoje na tržištu. Malo smo zakasnili u zavljanju kadra, imamo 2.080 uposlenih, od 60 do 80 ljudi godišnje odlazi u penziju, veliki broj ljekara je zbog specijalizacija promijenio radno mjesto, mnogi su otišli u inostranstvo", naveo je Baltić, te naglasio da 70 % zdravstvenih usluga u borbi protiv pandemije pruža Javna ustanova "DZKS". Dodao je da je dnevno potrebno između 150 i 170 ljudi da odgovore na izazov pandemije, te da taj kadar nemaju, ali da se svakodnevno bore sa izazovom pandemije.



Usvojena inicijativa za iznalaženje nove lokacije za gradsku deponiju

Na sjednici je usvojena inicijativa da Općinsko vijeće uputi zahtjev svim relevantnim institucijama koje se bave problematikom Regionalnog centra upravljanja otpadom Smiljevići, sa ciljem pokretanja postupka iznalaženja nove lokacije za potrebe deponije, uzimajući u obzir da se deponija nalazi u centru grada, i da je shodno svojim kapacitetima maksimalno iskorištena, te da se planiraju sredstava za trenutne i buduće aktivnosti RCUO Smiljevići.



Zavod za izgradnju KS već tri godine ne sanira klizišta u Novogradskoj općini

Razmatrano je i pitanje sanacije klizišta na području općine Novi Grad Sarajevo, a najviše polemike je bilo oko sanacije klizišta, u ulici Vladimira Preloga, vlasnika Samira Petrovića.

Načelnik Semir Efendić istakao je da sva klizišta u KS sanira Zavod za izgradnju KS, kako u Novom Gradu, tako i u svim općinama. Dodao je da je Zavod prije tri godine prestao raditi sanaciju svih klizišta, Općina Novi Grad Sarajevo im je tada prebacila 300.000 KM za sanaciju vrlo ozbiljnih klizišta, koje oni iz nekih razloga ne saniraju. "Tvrđili su tri godine da više neće raditi sanaciju klizišta, a onda se odjednom pojavljuju sa zahtjevom da Općina odobri saniranje jednog klizišta, u ulici Vladimira Preloga, pri tome ne pominjući uopće klizišta koja smo ranije ugovorili i za koja smo im prebacili novac. Mi apsolutno ne sporimo da oni saniraju i to klizište, ali smo sve vrijeme tražili i tražimo od njih, da saniraju i druga klizišta, da idu redom prioriteta, mi imamo više od 100 registrovanih klizišta, za sanaciju tri klizišta imamo potpisane ugovore s njima. Oni treba da saniraju klizišta, a ne mi, neka saniraju i ovo klizište u ulici Vladimira Preloga i mi ćemo im u tome pomoći, ali ne mogu ignorisati i ostala klizišta, koja imamo na području Novog Grada", naglasio je načelnik Efendić.

Nakon rasprave, jednoglasno je usvojena inicijativa da se od Zavoda za izgradnju KS zatraži, da po hitnom postupku, ubrza sanacije klizišta po prioritetima, onako kako struka procjenjuje, te da Općina Novi Grad Sarajevo i Služba CZ Kantona Sarajevo obezbijede sredstva za tu namjenu.

Izgradnja terminala za avionsko gorivo u skladu sa planom razvoja Međunarodnog aerodroma Sarajevo

Vijećnici su se interesirali za izgradnju terminala za avionsko gorivo u blizini Međunarodnog aerodroma Sarajevo. Odgovore na njihova pitanja dao je načelnik Semir Efendić. On je kazao da se radi o izgradnji u okviru prostora koji je Prostornim planom Kantona Sarajevo predviđen za razvoj aerodroma, prostora koji je urbanističkim planom Grada predviđen za razvoj aerodroma i prostora koji obuhvata Master plan ili plan razvoja aerodroma u Sarajevu. Obrazložio je da je to prostor za koji se ne donosi poseban planski dokument, po proceduri kako to donose općine, zato što



ga radi sam aerodrom i zato što ga usvaja Federalna vlada. Master plan je radila firma iz Italije i njime su predviđeni svi sadržaji koji se tamo grade. Dodao je da je javnu raspravu bilo dužno provesti Ministarstvo za komunalnu privredu ili prostorno uređenje KS, koje izdaje okolinsku dozvolu, i koje je tu dozvolu izdalo. Druga instanca je Ministarstvo privrede KS, koje izdaje vodne akte i to ministarstvo također je dalo dozvolu. Također je rekao da trebamo biti svjesni da se aerodrom mora razvijati i da je to naš najveći i jedini aerodrom tog tipa u BiH i da je njegov razvoj značajan za cijelu državu, a ne samo za Novi Grad i Ilidžu, na čijim prostorima se nalazi.

Iskazana spremnost za rješavanje pitanja parkinga za stanovnike Gandijeve ulice

Razmatrano je i pitanje iznalaženja rješenja za izgradnju parkinga za stanovnike ulice Gandijeva, gdje je i pored pokušaja Općinskog pravobranilaštva da spriječi izgradnju stambenog objekta na teritoriji manjeg bh. entiteta, stambena zgrada ipak izgrađena. Obzirom da će zgrada uskoro biti useljiva, te da nema osiguran parking za buduće stanare, potrebno je da se građanima, stanovnicima zgrade na teritoriji FBiH, omogući da imaju parking na koji se stanari iz te nove zgrade ne mogu parkirati.

Vežano za ovo pitanje načelnik Efendić je istakao da je od Službe za lokalnu samoupravu, tražio da naprave spisak stanara i automobila koji posjeduju građani u zgradi na teritoriji FBiH i da je spreman ići na to da Općina tim građanima da javnu površinu na korištenje, bez naknade, kako se ne bi dešavali ti problemi, iako je pitanje parkiranja jedno od pitanja za koje je Općina kroz peticiju građana, tražila od Ministarstva saobraćaja da joj se da, da kao lokalna zajednica uredi pitanje saobraćaja u mirovanju. "I dalje nemamo pravo na to, jer važećim Zakonom Ministarstvo saobraćaja KS reguliše pitanje parkinga. Očekujemo da nam Služba za lokalnu samoupravu dostavi tačan broj stanovnika i automobila, kako bi našli način da riješimo to pitanje", rekao je načelnik Efendić.

Na sjednici su usvojeni i prijedlozi odluka i rješenja iz imovinsko - pravne oblasti, prijedlozi odluka iz oblasti provedbeno - planske dokumentacije tj. Prijedlog projektnog programa za izradu UP "Rezidencijalno naselje Bojnik", te prijedlog



Odluke o pristupanju izradi izmjena i dopuna RP "Ahatovići" - izgradnja stambenog objekta na k.č. 330/3 K.O. Bojnik (po skraćenom postupku). Usvojen je i Program uređenja građevinskog zemljišta za 2021. godinu, kao i Odluka o rasporedu sredstava za finansiranje projekata u svrhu održivog povratka za 2021 godinu, sa zaključcima.

Vijeće je usvojilo i Odluku o izmjeni Odluke o novčanoj pomoći porodiljama koje nisu u radnom odnosu, uz prijedlog da resorne općinske službe razmotre mogućnosti da se u rebalansu budžeta planiraju sredstva kako bi se nezaposlenim porodiljama osigurala pomoć u iznosu od po 100 KM po djetetu, umjesto dosadašnjih 50 KM. Usvojen je i Izvještaj o realizaciji Odluke o stipendiranju učenika i studenata sportista za takmičarsku sezonu 2021/2022. godina.

U porastu kriminalitet u općini Novi Grad Sarajevo

Na dnevnom redu bila je i Informacija o stanju sigurnosti i aktivnostima IV PU za prvih šest mjeseci ove godine. O tome je prisutne informisao Sadik Ećo. Kada je u pitanju kriminalitet Ećo je kazao da su u prvoj polovini ove godine počinjena 504 krivična djela, što je više za 23,12 % u odnosu na isti period prošle godine, razbojništava je bilo 13, dok je u ovom periodu u prošloj godini bilo 15. Došlo je do povećanja krivičnih djela nasilja u porodici, u prošloj godini bilo ih je 15, a ove godine 25 takvih slučajeva u prvih šest mjeseci. Ukupno je dostavljeno 450 izvještaja nadležnom Tužilaštvu. Ećo je također kazao da je u navedenom periodu smanjen broj saobraćajnih nezgoda za 31 %.

Tokom diskusije iznesen je niz zamjerki na rad policijskih službenika, te istaknuta njihova pasivnost kada je u pitanju asistencija, tj. pružanje zaštite općinskim službenicima prilikom obavljanja službene dužnosti. Rečeno je da su općinski službenici prilikom obavljanja poslova na terenu vrlo često izloženi verbalnom, pa i fizičkom nasrtaju pojedinaca, a posebno uposlenici Službe za inspeksijske poslove. Iznesene su informacije da inspektorima, prilikom izvršenja

pravosnažnih rješenja, u nekoliko prilika nije pružena adekvatna podrška IV PU. Kada je u pitanju policijska asistencija Ećo pojasnio da je propisana instrukcija šta se u takvim situacijama mora ispuniti, da bi PU pružila asistenciju.

Shodno navedenom Vijeće je donijelo Zaključak da se od nadležnih institucija zatraži pojednostavljenje procedure prilikom traženja policijske intervencije i da policija bude na raspolaganju državnim službenicima, odnosno da ih zaštiti da mogu da rade svoj posao.



Donesena Odluka o izmjenama i dopunama Odluke o pristupanju osnivanja preduzeća "LOKOM" d.o.o. Sarajevo



Općinsko vijeće Novi Grad Sarajevo održalo je, 29.10.2021. godine nastavak tematske sjednice o poslovanju i djelovanju JP „Lokom“, na kojoj je, sa 22 glasa za i četiri suzdržana usvojilo Odluku o izmjenama i dopunama Odluke o pristupanju osnivanju preduzeća za upravljanje, zaštitu i održavanje objekata u vlasništvu Općine Novi Grad Sarajevo „LOKOM“ d.o.o. Sarajevo.

Podsjećamo, tematska sjednica, 29.jula.2021. godine prekinuta je nakon višesatne rasprave i iznošenja iscrpnih prijedloga i pitanja vijećnika, te donošenja zaključka da se nastavak tematske sjednice održi u narednom periodu, ne dužem od 60 dana, a da do tada Kolegij Općinskog vijeća u saradnji sa općinskim načelnikom i Skupštinom JP „Lokom“, pripremi set mjera za dalje funkcionisanje i djelovanje JP „Lokom“, kao i eventualne izmjene akata preduzeća.

Ovom Odlukom, između ostalog, usaglašene su promjene vezane za upravljanje preduzećem..Do sada je Općina upravljala preduzećem putem Skupštine koju su činili pomoćnici načelnika, a sada će Skupštinu, koju će činiti pet članova imenovati Općinsko vijeće, na prijedlog općinskog načelnika, po provedenoj proceduri u skladu sa Zakonom, odnosno nakon provedenog Javnog poziva.

Dakle, Općinsko vijeće bit će uključeno u procese preduzeća, ali je zadržana i uloga općinskog načelnika, odnosno organa uprave, time što on daje saglasnost na imenovanje samog direktora preduzeća. Izmjenama Odluke smanjuje se i broj izvršnih direktora, tako da će sada preduzeće „Lokom“ pored direktora imati jednog izvršnog direktora, umjesto dva, kako je do sada bilo.

Općinski načelnik Semir Efendić u svom obraćanju kazao je da je upravljanje preduzećem i ranije bilo efikasno, da su Skupštinu preduzeća činili jedan broj pomoćnika načelnika, onih djelatnosti koje su vezane za rad preduzeća „Lokom“ i da je takav sistem uspostavljen prilikom formiranja JP „Lokom“ 2008/2009 godine.

„Činjenica je da nisu bile dovoljno definisane neke stvari u vezi sa ulogom Općinskog vijeća. U ranijoj Odluci bilo je definisano da

se Općinskom vijeću dostavlja na usvajanje izvještaj o poslovanju preduzeća u toku jedne godine, ali ni na koji način nije bilo definisano šta se dešava kada Vijeće ne usvoji izvještaj ili u slučaju usvajanja tog izvještaja. Izmjenama ove Odluke definiše se, da ukoliko Vijeće ne usvoji izvještaj o poslovanju JP „Lokom“ za jednu godinu, to podrazumijeva pokretanje procedure razrješenja organa preduzeća“, kazao je Efendić.

Pored toga, izmjenama Odluke definisane su određene stvari vezane za način rada Skupštine i odluke koje ona donosi dvotrećinski natpolovičnom većinom. Također je izmijenjen član 15. Odluke o osnivanju, a tiče se odgovaranja preduzeća imovinom. Ranijom Odlukom bilo je definisano da ono odgovara imovinom osnivača tj. Općine, što je sada promijenjeno da preduzeće odgovara svojim osnivačkim ulogom i imovinom.

„Ovo je bio minimum koji se mogao uraditi, obzirom da smo mi preduzeću prenijeli jedan dio nadležnosti koje se prije svega odnose na održavanje određene komunalne infrastrukture. To je isključiva i direktna nadležnost službi. Sada bi bilo važno da ove promjene koje napravimo ne izazovu u budućnosti nikada situaciju da preduzeće bude blokirano“, kazao je načelnik Efendić.

Vijećnik DF-a Mirza Memišević smatra da za donošenje ovakve Odluke nije bilo potrebe da se mijenjaju sistemski akti koji definiraju rad preduzeća, ako nije ustanovljeno da nešto u „Lokomu“ ne funkcionira. Izrazio je zabrinutost da preduzeće „Lokom“ izmjenom akata i uključivanjem Vijeća u procese rada preduzeća, ne dođe u sličnu situaciju kakvu imamo u javnim preduzećima na nivou Kantona Sarajevo, gdje direktora ima, a usluge nema.

Nakon donošenja ove Odluke preostaje da organi preduzeća „Lokom“ u roku od 30 dana usklade Statut i druge akte preduzeća sa ovom izmjenom Odluke o pristupanju osnivanju JP „Lokom“.



Usvojen Nacrt budžeta Općine Novi Grad Sarajevo za 2022. godinu u iznosu od 43.122.000 KM



Općinsko vijeće Novi Grad Sarajevo, na 8. radnoj sjednici usvojilo je Nacrt budžeta Općine za narednu godinu u iznosu od 43.122.000 KM.

Nacrt budžeta bit će upućen u javnu raspravu koja će trajati 21 dan, a materijal će biti dostupan na zvaničnoj web stranici Općine, te će biti objavljen i u jednim dnevnim novinama, tako da će svi oni koji budu zainteresirani imati priliku vidjeti planirano.

Javna rasprava o Nacrtu budžeta održat će se u svim mjesnim zajednicama na području općine Novi Grad Sarajevo, svi zainteresirani subjekti, savjeti mjesnih zajednica, klubovi vijećnika koji participiraju u Općinskom vijeću, organizacije i svi građani, imat će mogućnost učestvovati u javnim raspravama i iznijeti svoje prijedloge, sugestije i primjedbe, te time dati doprinos da budžet Općine za ovu godinu bude što kvalitetniji. Po završetku javne rasprave, nadležna služba pripremit će Prijedlog budžeta za 2022. godinu o kojem će se vijećnici izjašnjavati decembrskoj sjednici OV.

I u predstojećoj godini na području općine Novi Grad Sarajevo bit će nastavljena realizacija kapitalnih projekata, ali i socijalnih programa. Neće izostati stipendiranje učenika i studenata, podrška sportskim klubovima, zatim pomoć porodiljama, jednokratna izdvajanja za borbe i socijalno ugrožene stanovnike itd.

Planirana su i sredstva za dovršetak ranije započetih kapitalnih projekata, te drugih infrastrukturnih projekata kao što su izgradnja vodovodne i kanalizacione mreže, rekonstrukcija i asfaltiranje lokalnih puteva, trgova, parkinga i mostova, izgradnja šetališta, igrališta i parkova i drugih projekata koji su značajni za život stanovnika najmnogoljudnije općine u KS.

Usvojen je izvještaj o realizaciji Odluke o stipendiranju učenika i studenata sportista za takmičarsku sezonu 2020/21, a Vijeću je predočena i informacija o izvršenju budžeta za period 1. januar - 30. septembar, kao i informacija o realizovanim aktivnostima KJKP "Vodovod i kanalizacija" na području općine Novi Grad Sarajevo.

O aktivnostima koje su rađene na području Novogradske općine prisutne je informisao Adnan Šerak, izvršni direktor ViK-a za sektor kanalizacije. On je pohvalio saradnju sa nadležnom općinskom službom, istakavši da nije bilo problema kada su rađene rekonstrukcije i obnove vodovodne mreže.

Vijećnici su iznijeli probleme građana padinskih naselja, gdje preduzeće Vodovod i kanalizacija adekvatno ne odgovara na pozive građana ili gdje uposlenici ViK-a izađu na teren i konstatuju da nisu nadležni za otklanjanje kvara na vodovodnoj mreži, tako da naši građani ne znaju kome da se obrate, kako bi se zaustavilo bespotrebno curenje vode, koja pri tome uništava putnu infrastrukturu.

Problem devastacije i neodržavanja sportskih igrališta

Vijećnicima je prezentirana i informacija o izgrađenosti i rekonstrukciji sportskih igrališta, o čemu je govorio Nermin Kahrović, šef odsjeka Službe za investicije i komunalne poslove. On je kazao da na području općine Novi Grad Sarajevo ima ukupno 54 sportska igrališta, od čega su dva igrališta pod nadzorom JP „Lokom“.

U budžetu Općine Novi Grad Sarajevo svake godine planiraju se finansijska sredstva za rekonstrukciju postojećih i izgradnju novih sportskih igrališta, kao i za hitne intervencije na postojećim igralištima.

Općina je u proteklom periodu izgradila 12 sportskih igrališta, dok je u protekle dvije godine urađena sanacija i rekonstrukcija 16 sportskih igrališta.

Za održavanje sportskih igrališta nadležno je Kantonalno javno komunalno preduzeće "Park", međutim, igrališta se ne održavaju redovno, što predstavlja problem za njihovo korištenje. Općina Novi Grad Sarajevo svake godine potpisuje sporazum sa JP "Lokom" za vršenje hitnih intervencije na dječijim i sportskim igralištima kako bi osigurala našoj djeci i omladini normalne uslove za sportske aktivnosti.

"Mi imamo relativno loše stanje velikog broja sportskih igrališta na području općine Novi Grad Sarajevo. Isključivi problem je nedovoljno održavanje tih sportskih igrališta, gdje imamo situaciju da zbog neodržavanja, kroz tri, četiri godine nakon izgradnje ili rekonstrukcije dobijemo igrališe koje je nesigurno za upotrebu, što zahtjeva novu rekonstrukciju i finansijska sredstva. Također, imamo problem stalnih vandalizama i devastacija, koji su enormni", ističe Kahrović, navodeći primjer sportskog igrališta u Bojniku, u Dobroševićkoj ulici, gdje je panelna ograda koja je postavljena oko igrališta uništena i prije tehničkog pregleda. Mi smo to popravili, ali ograda je ponovo uništena", rekao je Kahrović.

Shodno navedenom Vijeće je donijelo zaključak da se napravi plan aktivnosti za sprečavanje i zaštitu javne imovine igrališta i

spomen – obilježja, koja su sve češće meta vandala, kao i da se u ovu problematiku više uključiti policija.

Vijeću je prezentirana i informacija o uspjehu učenika u osnovnim školama i postignutim uspjesima na takmičenjima na kraju 2020/2021. školske godine, kao i informacija o rezultatima sportskih klubova sa područja općine na kraju takmičarske sezone.

Predsjedavajući Mirza Selimbegović ugostio Aldina Šetkića, jednog od najboljih bh. tenisera



Predsjedavajući Općinskog vijeća Novi Grad Sarajevo Mirza Selimbegović ugostio je Aldina Šetkića, jednog od najboljih bh. tenisera. Tridesettrogodišnji uspješni sportista stanovnik je općine Novi Grad Sarajevo i trenira na teniskim terenima u Centru „Safet Zajko“. Dugogodišnji je član teniske Davis Cup reprezentacije Bosne i Hercegovine, osvajač je 46 turnira širom svijeta iz ATP kalendara, koji se boduje za svjetsku ATP listu. Prošle godine Aldin Šetkić izabran je za predstavnika svih Evropskih ITF igrača pri Savjetu ITF igrača čitavog svijeta, čime je ukazana velika čast da teniser iz BiH bude dio jedne takve organizacije, a učesnik je više od 20 najvećih Grand Slam turnira Australian Open, Roland Garos, Wimbledon, US Open itd.

Sa predsjedavajućim Općinskog vijeća Mirzom Selimbegovićem, Šetkić je razgovarao kako na najbolji način iskoristiti trenutak kada je tenis u velikom zamahu i popularizaciji i doprinjeti da djeca od 10 do 18 godine imaju dobre uslove za trening i bavljenje tenisom.

„Centar „Safet Zajko“ je nešto što nema nigdje u BiH, gdje su osigurani uslovi za sve vrste sportova i gdje možemo vidjeti svakodnevno da tu trenira više od 500 djece, kao i više od 150 malih tenisera. Želimo da se izgrade još dva teniska terena, a najbolje bi bilo izgraditi jedan dvoranski, zatvorenog tipa, kako bi imali uslove za trening tokom cijele godine, jer zima u Sarajevu traje skoro sedam mjeseci, kazao je Šetkić.

Baveći se ovim sportom Aldin je obišao cijelu Evropu i dosta svijeta, kaže da nešto što je u Njemačkoj, Belgiji, Holandiji, Austriji normalno, gdje svaki grad ima dva ili tri centra poput „Safet Zajko“ centra, nažalost kod nas u BiH nije tako, ali je sretan da je na području općine u kojoj stanuje napravljen jedan takav centar, daleko poznati Centar „Safet Zajko“.

Predsjedavajući Selimbegović je iskazao zadovoljstvo da je imao priliku ugostiti jednog vrhunskog sportistu, bh. reprezentativca, što mu, kako je kazao na neki način najviše znači, jer predstavlja našu državu svugdje u svijetu.

„Hvala mu za sve što je do sada uradio, i naravno čast nam je da ga ugostimo i da vidimo kako i na koji način možemo u narednom periodu dati svoj doprinos da tenis kao sport bude što zastupljeniji i da ima što bolje uslove za treniranje“, rekao je Selimbegović.

Prijem za predstavnike Ureda za borbu protiv međunarodne trgovine drogom MVP SAD-a i Ureda za borbu protiv korupcije KS



U posjeti Općini Novi Grad Sarajevo, 21. septembra, boravili su direktor Ureda za borbu protiv međunarodne trgovine drogom i provođenje zakona Ministarstva vanjskih poslova SAD-a Stephen T. Glaser i šef Ureda za borbu protiv korupcije KS dr. Erduan Kafedžić.

Sastanak je upriličen na inicijativu rukovodstva Općinskog vijeća Novi Grad Sarajevo, predsjedavajućeg Mirze Selimbegovića i zamjenika Abela Baltića, Vernesa Ćosića, Maje Muftić Dedović i Drage Jurića.

Tema je između ostalog bila i inicijativa da se Općina Novi Grad Sarajevo kao i druge gradske općine u Sarajevu integriše u jedinstveni antikoruptivni sistem Ureda za borbu protiv korupcije Kantona Sarajevo. Bitno je napomenuti da su do sada sve gradske općine osim Novogradske općine već integrisale u spomenuti sistem koji omogućava viši nivo transparentnosti rada javnih institucija, te građanima omogućava uvid na koji način se raspolaže javnim resursima.

Stephen T. Glasser je naglasio da su oni podrška transparentnosti i izrazio zadovoljstvo ukoliko se usvoji ova inicijativa koja će doprinijeti da Općina Novi Grad Sarajevo poveća svoju transparentnost.

Iz Ureda su naglasili da nema smetnji, kako pravnih, tako i finansijskih da se Općina Novi Grad Sarajevo integriše u antikoruptivni sistem Ureda. Za integraciju nisu potrebna finansijska sredstva, a postoje i sve pravne pretpostavke. Važna je centralizacija antikoruptivnih aktivnosti u Kantonu Sarajevo.

Iskazana je volja rukovodstva Općinskog vijeća da se već na narednoj sjednici usvoji inicijativa kojom bi se Općina Novi Grad Sarajevo integrisala u spomenuti sistem.

„Ovaj sastanak dio je naših višemjesečnih napora da se Općina Novi Grad Sarajevo integriše u već postojeći antikoruptivni sistem, što građanima, između ostalog, omogućava uvid ko je zaposlen i ko se zapošljava u Općinu Novi Grad Sarajevo kao i kako se troši budžetski novac. To je važan alat koji građanima omogućava da prate stvarnu transparentnost javnih institucija, te je važan korak u borbi protiv korupcije i nepotizma“, kazao je Mirza Selimbegović, predsjedavajući Općinskog vijeća.



SFK 2000 Sarajevo najuspješniji ženski nogometni klub u Bosni i Hercegovini



Novogradski ženski nogometni klub SFK 2000 Sarajevo najuspješniji je ženski nogometni klub u Bosni i Hercegovini. Šampionsku titulu, nogometašice ovog kluba, osvojile su 19 puta, dok su 17 puta osvojile kup. Najtrofejnije nogometašice naše zemlje treniraju na sportskim terenima u Centru "Safet Zajko", gdje se, kako kažu, u najboljim mogućim uslovima, pripremaju za nova takmičenja i osvajanje titula. Želja im je da u budućnosti ženski nogomet razvijaju na fudbalskom stadionu Otoka.

Prvakinje BiH u nogometu, predvođene Samirom Hurem, trenericom i osnivačicom kluba posjetile su Općinu Novi Grad Sarajevo, gdje ih je ugostio predsjedavajući Općinskog vijeća Mirza Selimbegović, sa kojim su razgovarale o dosadašnjim rezultatima i budućim planovima i izazovima koji su pred njima. Prijemu su prisustvovali i zamjenica predsjedavajućeg Maja Muftić - Dedović i Silvije Kristić, vijećnik i predsjednik Komisije za sport Općinskog vijeća Novi Grad Sarajevo.

19 puta prvakinje Bosne i Hercegovine

"Mi postojimo već 20 godina, a 19 godina smo prvakinje Bosne i Hercegovine. Igramo na najvišem nivou i naši rezultati prepoznati su u Evropi, jer igramo i Ligu šampiona. Općina Novi Grad Sarajevo nam pruža podršku od samog početka. Pored ostalog, imali smo nedavno podršku Općine, kada smo tražili pomoć da zadržimo naše igrice, jer u ovoj situaciji pandemije bilo je teško dobiti sredstva za bilo šta. Onda nam je pomogao općinski načelnik da se njihove stipendije izvrše na vrijeme i tako da je ta podrška u kontinuitetu. Mi treniramo u Centru "Safet Zajko", to je najljepši i najbolji centar, što se tiče uslova treninga to nam je prvo obezbjedila Općina Novi Grad Sarajevo i tako se razvijala naša škola fudbala. Vremenom smo prerasli u veći klub, naše ambicije i odgovornost prema rezultatima su mnogo veće", istakla je Hurem i dodala:

"Želja nam je da u saradnji sa Općinom Novi Grad Sarajevo, uz

podršku načelnika i Vijeća pokušamo dovesti ženski fudbal na stadion Otoka, jer tu smo počele, tu smo napravile naše najbolje rezultate i tu smo dovele najbolje igrice iz Evrope. Želimo u budućnosti da stadion Otoka napravimo funkcionalnim, uz pomoć projekata za ženski fudbal koji bi podržale UEFA i FIFA, uz Nogometni savez BiH i uz učešće lokalne zajednice, da nam svima Otoka bude centar za razvoj ženskog fudbala i omladinskog fudbala. Mi želimo da u Općini Novi Grad Sarajevo, u osnovnim školama pokrenemo sve djevojčice koje žele da se bave sportom i da pomognemo svim nastavnica sporta da kroz saradnju formiramo sekcije", istakla je Hurem.

Nastavak kontinuirane podrška Općine Novi Grad Sarajevo

Predsjedavajući Selimbegović poželio je dobrodošlicu gostima, istakavši da mu je čast ugostiti kolektiv koji iza sebe ima jako dobre rezultate.

"Željeli smo na neki način odati im priznanje za sve što su do sada uradili, i nadamo se da ćemo kao i do sada biti dio njihovog uspjeha, da ćemo im pružiti podršku i više nego što je do sada bilo. Ipak je ovo jedini klub koji se takmiči u Evropi i postiže ovakve uspjehe. Mi to trebamo da prepoznamo kao lokalna zajednica. Naravno to nije dovoljno da bi oni zadržali ovakav način rada i da ostvaruju ovakve uspjehe, da bi napravili nešto više, trebat će podrška i drugih organa i drugih nivoa vlasti. Mi se nadamo da ćemo sa naše strane uraditi ono što bude u našoj mogućnosti, da doprinesemo tome, a nadamo se da će i ostali", kazao je Selimbegović.

U seniorskom timu SFK kluba 2000 je 25 igrice, a oko stotinjak djevojčica od šest do 14 godina takmiče se u svojim rangovima. Sa njima rade igrice koje su obrazovane, profesionalne trenerice u fudbalu.

Selimbegović i Okerić o realizaciji zajedničkih projekata Općine Novi Grad Sarajevo i Kantona Sarajevo

Predsjedavajući Općinskog vijeća Novi Grad Sarajevo Mirza Selimbegović sastao se sa predsjedavajućim Skupštine Kantona Sarajevo Elvedinom Okerićem, sa kojim je nakon sastanka obiша nekoliko naselja na prostoru općine Novi Grad Sarajevo.

Ovom prilikom, razgovarano je o saradnji najmnogoljudnije Općine u Bosni i Hercegovini i Kantona Sarajevo, kao i o mogućnostima konkretne podrške KS u realizaciji nekoliko projekata za koje postoje već ranije potpisani sporazumi.

„Ova Općina ima mnogo problema, jer ima i tako veliki broj stanovnika, posebno u njenim padinskim dijelovima, koji još uvijek nemaju na najadekvatniji način riješena infrastrukturna pitanja, a u okviru njih i vodovodnu i kanalizacionu mrežu“, istakao je predsjedavajući Selimbegović, te dodao kako budžet Općine nije dovoljan za rješavanje ovih problema.

Naglasio je da o svim temama treba razgovarati direktno i tražiti rješenje kod nadležnih, a ne samo da se odgovornost prebacuje sa jednih na druge. Također je pohvalio dosadašnje zajedničko učešće Općine i Kantona u implementaciji projekata izgradnje IX transverzale, te rekonstrukcije i sanacije ulice Džemala Bijedića.

Selimbegović je predložio da se započine realizacija inicijative za gradnju škole u novim naseljima na Otoci, jer to predstavlja veliki problem stanovnicima tog dijela Novogradske općine.

Susret predsjedavajućeg OV Mirze Selimbegovića sa ministrom Enverom Hadžiahmetovićem

Ministar komunalne privrede, infrastrukture, prostornog uređenja, građenja i zaštite okoliša Kantona Sarajevo Enver Hadžiahmetović posjetio je, 27. jula, Općinu Novi Grad Sarajevo. Hadžiahmetović je u Novom Gradu boravio na poziv predsjedavajućeg Općinskog vijeća Mirze Selimbegovića. Sastanku su prisustvovali i zamjenica predsjedavajućeg OV Maja Muftić - Dedović, izvršni direktor KJKP „Vodovod i kanalizacija“ Adnan Šerak, te predstavnici Mjesne zajednice „Dobroševići“.

Tokom susreta razgovarano je o vodosnabdijevanju na području Novog Grada, posebno onih dijelova općine koji problem snabdijevanja vodom vide kao primarni, te je najavljena intenzivnija saradnja u rješavanju navedenih problema. Nakon sastanka prisutni su obišli naselja koja imaju problem sa redovnim snabdijevanjem vodom.

Ministar Hadžiahmetović je predložio da se formira stručno tijelo, koje će biti sastavljeno od predstavnika Ministarstva, Općine i KJKP „ViK“, kao i mjesnih zajednica, kako bi se poduzele aktivnosti koje će vrlo brzo proizvesti efekte, ali i napraviti plan za dugoročno rješavanje problema u snabdijevanju vodom i odvodnje otpadnih voda.

Predsjedavajući Selimbegović je zahvalio ministru Hadžiahmetoviću i direktoru Šeraku na posjeti istakavši značaj rješavanja ovih pitanja, jer Novogradska općina ima naselja koja još uvijek nemaju uredno vodosnabdijevanje, a veći dio općine nema urednu odvodnju otpadnih voda.

„Ovo jesu kompleksni problemi, i za njihovo rješavanje trebaju velika ulaganja, ali je važno da se konačno započnu aktivnosti i postepeno radi na njihovom rješavanju“, kazao je Selimbegović.





Načelnik Efendić na zasijedanju UO TDBB u Konyi



U petak, 29. jula, u gradu Konyi (Republika Turska) održana je sjednica Upravnog odbora Saveza općina turskog svijeta (TDBB) kojoj je prisustvovao i načelnik Općine Novi Grad Sarajevo Semir Efendić, kao član Upravnog odbora i potpredsjednik iz Bosne i Hercegovine.

31 lokalna zajednica pristupila je ovoj međunarodnoj organizaciji, koja promovira i razvija saradnju na lokalnom nivou i okuplja ukupno oko 1.200 općina i gradova iz 30 zemalja.

Iako je pandemija znatno uticala na sve procese na međunarodnom nivou zbog ograničenja u kretanju, kod većine projekata koje TDBB realizira u Bosni i Hercegovini, aktivnosti su se odvijale planiranom dinamikom. Na upravnom odboru bilo je riječi o više projekata u općinama članicama iz Bosne i Hercegovine, gdje su podneseni izvještaji o realizaciji, kao i odluke o početku realizacije novih projekata.

Načelnik Efendić se na sjednici Upravnog odbora u ime općina i gradova, kao i njihovih stanovnika, zahvalio na podršci brojnim projektima u Bosni i Hercegovini, istakavši da naša zemlja prednjači po broju projekata, koje realizira TDBB u nekoj od zemalja članica. Osim sjednice UO, održani su i odvojeni sastanci sa gradonačelnikom Konye Ibrahimom Ugur Altayom, te načelnicima nekoliko općina iz sastava grada Konye, koji broji oko 2,5 miliona stanovnika i čija površina je približna površini Bosne i Hercegovine.

Načelnik Efendić ugostio zamjenika gradonačelnika Grada Pesara iz Italije



Načelnik Općine Novi Grad Sarajevo Semir Efendić, ugostio je Daniela Viminija (Daniele Vimini), zamjenika gradonačelnika talijanskog Grada Pesara, za kulturu, investicije, turizam, bratimljenje gradova i međunarodnu saradnju.

Posjeta je upriličena u ime višegodišnjeg prijateljstva Općine Novi Grad i Grada Pesara, grada koji je zbog svoje bogate historije umjetnosti i kulture pod zaštitom UNESCO-a.

Tokom susreta razgovarano je o trenutnim i budućim projektima iz oblasti kulture i sporta, kao i projektima vezanim za stipendiranje učenika sa područja Novog Grada i Pesara. Istaknuta je zajednička spremnost za organiziranje muzičkog festivala, likovnih izložbi i edukativnih sadržaja u općini Novi Grad i Gradu Pesaru.

Grad Pesaro baštini 42 godine dugu tradiciju održavanja međunarodnog muzičkog festivala „Rossini opera festival“.

„Od sljedećeg mjeseca ćemo raditi na novom muzičkom projektu, s ciljem da se spoji iskustvo muzike Novog Grada i Grada Pesara, te u skladu s tim na razmjeni i stipendiraju studenti sa područja općine Novi Grad“, kazao je Vimini.

Dodao je da su 2017. godine dobili priznanje od UNESCO-a i da na taj način imaju želju da naprave saradnju sa Općinom Novi Grad i sa studentima.

„Radimo i sa Ambasadam na promovisanju novog projekta između Italije i Bosne i Hercegovine, vezano za sport, jer sport je važan aspekt ova dva grada, koji možemo koristiti kao teren i za druge važne poslove“, istakao je Vimini.

Načelnik Općine Selcuklu iz Konye Ahmet Pekyatirmaci posjetio Općinu Novi Grad Sarajevo



Načelnik Općine Novi Grad Sarajevo Semir Efendić sa pomoćnikom Tajibom Delalićem, ugostio je Ahmeta Pekyatirmaci, načelnika Općine Selcuklu iz Konye.

Satanak je bio prilika za razgovor o dosadašnjim aktivnostima koje je Općina Selcuklu uspješno realizirala na području cijele BiH, kao i za razgovor o budućoj saradnji na novim projektima između Općine Novi Grad Sarajevo i Općine Selcuklu.

Posebna pažnja posvećena je edukaciji i razmjeni učenika sa područja ove dvije općine. Naglašeno je da se historijska veza Sarajeva i Konye treba nastaviti realiziranjem uspješnih projekata u svim oblastima.



Prijem za bh. olimpijca u taekwondou Nedžada Husića



Načelnik Općine Novi Grad Sarajevo Semir Efendić ugostio je, 10. septembra, mladog bh. olimpijca i viceprvaka Evrope u olimpijskom taekwondou Nedžada Husića, koji je ove godine osvojio 5. mjesto na Olimpijskim igrama u Tokiju i ostvario najveći uspjeh u historiji BiH na Olimpijskim igrama. U posjeti Općini Novi Grad Sarajevo sa Husićem su bili i predsjednik Taekwondo saveza FBiH Samir Šarić i trener kluba Belmir Berberović.

„Ugostili smo našeg olimpijca Nedžada, koji je ove godine osvojio 5. mjesto na Olimpijskim igrama u Tokiju. On je zaista mlad sportista iz općine Novi Grad Sarajevo iz kluba "Novi Grad", koji je najuspješniji prema podacima Sportskog saveza BiH. Mi smo posebno ponosni da je to sportista iz naše općine, koji je postigao tako značajne rezultate. Na svima nama je da ga podržimo kao i sve druge sportiste, kako bi postizali vrhunske rezultate, svugdje u svijetu je tako. U vrhunski sport se mora ulagati, jer većina sportova nisu profitabilni kao što je možda fudbal. Sve države pružaju podršku u svijetu, tako ćemo morati i mi“, rekao je načelnik Efendić.

Ovom prilikom mladom olimpijcu uručena je finansijska podrška Općine u iznosu od 6.000 KM, za ostvarenu normu za učešće na Olimpijskim igrama u Tokiju, shodno Pravilniku o sufinansiranju programskih aktivnosti sportskih klubova/društava upisanih u Registar Općine Novi Grad Sarajevo. Tokom susreta razgovarano je i o poboljšanju infrastrukture koja je potrebna da bi se ostvarili vrhunski rezultati. Iskazana je spremnost Općine da se u narednom periodu osigura jedan prostor za Taekwondo centar, koji bi trebao Nedžadu i drugim sportistima kako bi osvajali medalje na olimpijskim igrama.





Načelnik Efendić ugostio delegaciju iz Republike Turske: Potpisan protokol o saradnji općina Novi Grad i Karatay u Konyi



Načelnik Općine Novi Grad Sarajevo Semir Efendić bio je domaćin delegaciji Republike Turske koja je krajan juna boravila u višednevnoj posjeti Bosni i Hercegovini, a tokom koje su, osim Sarajeva posjetili Jablanicu, Doboj i Srebrenicu. U delegaciji su bili načelnici nekoliko turskih općina, a predvodio je generalni sekretar Unije općina turskog svijeta (TDBB) Fahri Solak.

Ovom prilikom načelnik Efendić potpisao je protokol o saradnji dvije općine sa Hasanom Kilcom, načelnikom Općine Karatay iz Konye. Potpisivanju su prisustvovali i predsjedavajući Općinskog vijeća Novi Grad Sarajevo Mirza Selimbegović i Tajib Delalić, zamjenik predsjednika Komisije za saradnju sa lokalnim zajednicama Općinskog vijeća Novi Grad Sarajevo.

Načelnik Efendić kazao je da očekuje da će potpisivanje protokola ozvaničiti početak jedne lijepo saradnje u budućnosti između dvije općine. "Ovaj sporazum će omogućiti da mi u budućnosti tu saradnju imamo i u formalnom smislu, kao dvije lokalne zajednice. Očekujemo da se u sklopu saradnje realizuju i neki konkretni projekti, koji će biti na korist građana i Novogradske općine i Općine Karatay", rekao je načelnik Efendić.

Istaknuo je da je grad Konya mnogo pažnje posvetio Bosni i Hercegovini, te da cijeli jedan dio tog grada nosi ime Bosna i Hercegovina, tamo postoji i džamija Alija Izetbegović, park Haris Silajdžić itd., a osim toga, stanovnici Konye pružili su podršku tokom agresije na našu zemlju 1992-1995.

Hasan Kilca, načelnik Općine Karatay, kazao je će veza između Turske i Bosne i Hercegovine biti dodatno ojačana snažnim vezama između Konye i Novog Grada. "Mi ovu braću smatramo svojom i uvjeren sam da ćemo sa njima u budućnosti raditi lijepo projekte", rekao je Kilca.





Načelnik Efendić ugostio odbojkaški klub invalida "Fantomi", prvake BiH u sjedećoj odbojci

Zlatni momci, četverostruki prvaci Evrope i šesterostruki prvaci BiH u sjedećoj odbojci, te osvajači deset titula pobjednika Eurolige, reprezentativci i članovi odbojkaškog kluba invalida „Fantomi“ posjetili su 12. Jula, Općinu Novi Grad Sarajevo, gdje ih je ugostio općinski načelnik Semir Efendić sa saradnicima.

U delegaciji su bili direktor kluba Mirsad Mirojević, trener Sead Mršo, kapiten Mirzet Duran, sekretar i igrač kluba Vejiz Šabić te igrači Neko Dacić i Mirza Mršo. Sa načelnikom Efendićem razgovarali su o postignutim uspjesima, budućim planovima, kao i o nastavku saradnje sa lokalnom zajednicom.

Odbojkaši ovog kluba nedavno su osvojili još jednu titulu šampiona BiH u najvećem derbiju evropske sjedeće odbojke.

Načelnik Efendić ovom prilikom čestitao im je na postignutom uspjehu i zalaganju, uz želju za nove uspjehe. Podsjetio je da Općina Novi Grad Sarajevo sufinansira programske aktivnosti sportskih klubova i društava sa svog područja, koji ostvaruju zapažene rezultate tokom takmičarske sezone, kao jedan vid podrške razvoju sporta u lokalnoj zajednici i nagrade onima koji postižu rezultate.

„Imamo masovnost u sportu, kroz Registar sporta, kojeg smo uspostavili 2017. godine, pokušali smo usmjeriti klubove da postižu više rezultata i takve klubove, odnosno najbolje plasirane više podržavamo“, rekao je načelnik Efendić.

Direktor kluba i nekadašnji igrač Mirsad Mirojević zahvalio je načelniku na izdvojenom vremenu i dosadašnjoj podršci, istakavši značaj sportske infrastrukture, koja je u proteklim godinama u Novogradskoj općini na jednom zavidnom nivou. „Infrastruktura za treniranje je odlična, imamo najbolje uslove u Evropi, nama kao klubu koji okuplja invalide najbolje odgovara dvorana „Ramiz

Salčin“ na Mojmilu. Ove godine klub slavi 25. godišnjicu postojanja i 20 godina organiziranja Međunarodnog turnira u sjedećoj odbojci „Sarajevo Open“, na kojem su učešće uzele ekipe iz cijeloga svijeta“, rekao je Mirojević, istakavši da iza uspjeha ovog kluba stoji veliki trud, rad i zalaganje.

Mirzet Duran, kapiten je odbojkaškog kluba invalida „Fantomi“ od 2012. godine, a odbojku je počeo trenirati od svoje 16. godine. „Što se tiče zadnje sezone, gdje smo postali prvaci Bosne i Hercegovine u sjedećoj odbojci jesenji dio prvenstva smo završili na prvom mjestu bez poraza. U zadnjem kolu smo doživjeli poraz od našeg rivala, međutim to nije utjecalo na konačni plasman, gdje je nama samo u zadnjoj utakmici trebao jedan set da bi postali prvaci. Na našu sreću osvojili smo taj prvi set i slavije je moglo da počne“, kaže Mirzet.

Ističe da ih u narednom periodu očekuje nastup na Paraolimpijskim igrama u Tokiju, u periodu august/septembar, a nakon toga 20. jubilarni turnir „Sarajevo Open“. „Planiran je za prvi vikend u oktobru, zbog situacije sa pandemijom. Očekujemo da će kao i svake godine biti jedan od najjačih turnira u Evropi, gdje nam dolaze ekipa Rusije kao aktuelni prvak Evrope i ekipa Njemačke kao trećeplasirana ekipa Evrope, reprezentacije Brazila, Irana itd. Nakon tog turnira, za nekih 15-tak dana slijedi i Evropsko prvenstvo seniorske reprezentacije, tako da će većina tih reprezentacija iskoristiti ovaj turnir za sam nastup na Evropskom prvenstvu“, istakao je Duran.

OKI „Fantomi“, osnovan je 1995. godine s ciljem okupljanja osoba s invaliditetom, stradalnih u ratu i od tada niže uspjehe jedan za drugim. Prvaci Evrope prvi put su postali 2004. godine u Njemačkom gradu Leipzigu, osim što su višestruki prvaci Evrope, dvostruki su osvajači kupa, a osim toga i jedna velika složna porodica. Klub okuplja oko 30 osoba, od kojih je 18 aktivnih igrača .

Oko 200 stanovnika koristilo zemljište u državnom vlasništvu za poljoprivrednu proizvodnju

Zasijano 10 hektara zemljišta

Oko 200 stanovnika (porodica) općine Novi Grad Sarajevo koristilo je i ove godine zemljište u državnom vlasništvu za poljoprivrednu proizvodnju na površini od 10 hektara.

Kao i prošle godine Općina Novi Grad Sarajevo i ove je godine svojim stanovnicima na besplatno korištenje dodijelila zemljište u državnom vlasništvu. Oko 200 građana, koji su se prijavili na javni poziv početkom marta ove godine, dobilo je priliku da na parcelama od oko 300 kvadratnih metara za vlastite potrebe proizvode hranu. Obzirom na to da je većina korisnika iz prethodne godine iskazala interes za nastavak korištenja zemljišta, ove godine osigurane su i dodatne površine poljoprivrednog zemljišta.

Prije same sjetve izvršeno je oranje i frezanje zemljišta, tako da su korisnici na korištenje dobili u potpunosti spremno zemljište za sjetvu i sadnju. Obezbijeđen i podijeljen sadni i sjemenski materijal.

Pored toga još sedam hektara zemljišta dodijeljeno je stanovnicima koji imaju farme tovne junadi i muznih krava kako bi mogli proizvoditi stočnu hranu, dok je na tri hektara općinska služba Civilne zaštite zasijala kumpir.



Sa 25 početnika u biznisu potpisani ugovori za sufinansiranje troškova poslovanja



Sve više mladih ljudi, ali i starijih stanovnika općine Novi Grad Sarajevo, odlučuje se za samostalni biznis, u namjeri da sebi, ali i drugima, obezbijede zaposlenje. Sa 25 novoregistriranih samostalnih poduzetnika – početnika u biznisu, načelnik Općine Novi Grad Sarajevo Semir Efendić, potpisao je ugovore za sufinansiranje troškova njihovog poslovanja.

Nejla Ugljanin, jedna je od onih koju ni pandemija nije obeshrabrila da istraje u namjeri, da sama sebi osigura egzistenciju. Nejla je prije nekoliko mjeseci počela izrađivati gumice za kosu, prije svega za sebe, a kasnije i za druge. Međutim, vrlo brzo ispostavilo se da su se njene gumice svidjele široj populaciji. Za kratko vrijeme njeni proizvodi našli su se na policama poznatih veleprodajnih objekata "Bingo" i "DM".

"Sasvim slučajno sam poslala ponudu da ljudi vide, ako im se sviđa da uzmu. "Bingo" je prvi uzeo moje proizvode, plasirali su ih i pokazalo se jako dobro, a kasnije sam dobila priliku da svoje proizvode plasiram i putem "DM" trgovina. Prodaja ide dobro i može se fino zaraditi i živjeti od svoga rada. Osim navedenih trgovina prodaja ide i putem društvenih mreža Instagram i Facebook", kaže Nejla i naglašava da je podrška Općine u ovakvim biznisima od izuzetne pomoći, jer se na početku uvijek najviše ulaže u materijal, mašine i sve drugo što je potrebno da se uopće pokrene jedna vrsta biznisa.

Nedim Čimpo je sa suprugom pokrenuo zajednički obrt "ST. RING" za računarsko programiranje. "Trenutno smo u fazi pregovora sa više klijenata, a radimo za jednog. Razlog pokretanja našeg biznisa jeste legaliziranje tržišta rada, koje je dosta neuređeno kada je u pitanju freelancing u BiH. Sredstva koja dobijemo od Općine Novi Grad Sarajevo koristit ćemo za uplaćivanje punih radnih doprinosa", istakao je Nedim.

Uz podršku općine zaposleno 375 osoba

Prisutnim potpisnicima ugovora načelnik Efendić čestitao je na pokretanju vlastitih biznisa i poželio im uspjeh u radu. Kazao je da je ova podsticajna mjera jedan vid podrške stanovnicima općine Novi Grad Sarajevo, koji žele da sami sebi osiguraju radno mjesto, registriranjem obrtničke, ugostiteljske ili druge vrste djelatnosti, sufinansiranjem troškova u iznosu od oko 5.500 KM tokom dvije godine, a isplata se vrši kvartalno.

Ova podsticajna mjera provodi se od 2018. godine, Općina je do sada podržala 315 samostalnih poduzetnika, a kroz taj program zaposleno je 375 osoba.

Pravo na ovaj vid podrške mogu ostvariti fizička lica koja registruju osnovnu djelatnost u nadležnim općinskim službama Kantona Sarajevo počevši od 01.01.2021. godine (obrti, trgovinske ili ugostiteljske djelatnosti i radnje), a imaju najmanje godinu dana prebivalište na području općine Novi Grad Sarajevo.

Nova rasvjeta na parkinzima u naseljima Dobrinja, Alipašino Polje, Mojmiilo, Otoka...



Općina Novi Grad Sarajevo u 2019. godini započela je realizaciju projekta obnove i modernizacije rasvjete na parkinzima, a nakon obnove javne rasvjete na 26 parkinga u općini Novi Grad Sarajevo, u prošloj i ovoj godini nova rasvjeta postavljena je na još 36 parkinga u naseljima Dobrinja, Mojmiilo, Alipašino Polje, Švrakino Selo, Hrasno, Otoka i Čengić Vila.

Parkinzi su bili veoma loše osvijetljeni, jer rasvjeta nije mijenjana proteklih 40 godina. Zamjenom postojeće dotrajale LED rasvjetom, poboljšat će se osvijetljenje, pri čemu će se stanovnici općine Novi Grad Sarajevo osjećati sigurnije. Osim toga, bolja rasvjeta doprinosi funkcionalnosti i sigurnosti parkiranja, ali i kretanja građana, a istovremeno štedi električnu energiju.

Osim parkinga, u prošloj godini osvijetljeno je i šetalište u A fazi Alipašino Polja, duž Trga solidarnosti i Trga međunarodnog

prijateljstva, gdje je postavljeno 87 novih stubova sa led rasvjetnim tijelima na dionici od oko jednog kilometra, od zgrade Općine do studentskih domova u Nedžarićima.

Projekat obnove i modernizacije rasvjete na parkinzima, jedan je od projekata izgradnje nove i obnove stare javne rasvjete, koje je Općina uradila proteklih godina, a javna rasvjeta izgrađena je na oko 440 lokacija, gdje je postavljeno oko 2.500 novih rasvjetnih tijela.

Izgrađeno 165 parking mjesta na Dobrinji i Otoci



Izgradnjom novih i proširenjem postojećih parkinga Općina Novi Grad Sarajevo u ovoj godini osigurala je 165 novih parking mjesta stanovnicima naselja Dobrinja i Otoka. Projekat se realizira s ciljem rješavanja saobraćaja u stanju mirovanja, te odvajanja pješačkih od zona za motorni saobraćaj.

U ulici Lava Tolstoja novih 65 parking mjesta

U naselju Dobrinja, u ulici Lava Tolstoja kod kružnog toka izgrađen je parking kapaciteta oko 65 mjesta za parkiranje. Radovi su dio projekta sanacije proširenja servisnih saobraćajnica sa izgradnjom novih parking površina, kojima se reorganizira unutrašnji saobraćaj u naselju Dobrinja, a kojeg Općina realizira od prošle godine, kako bi se šetalište na Bulevaru branilaca Dobrinje zatvorilo za saobraćaj, a izgradnjom novih parking mjesta osigurao proctor za parkiranje vozila koja su se ranije parkirala u pješačkoj zoni.



Novi parking u ulici Branislava Nušića

U ulici Branislava Nušića izgrađen je novi parking prostor za 27 motornih vozila. U sklopu radova postavljena je javna rasvjeta i izgrađena oborinska odvodnja. Nakon ovih radova izvršena je rekonstrukcija škarpe, hortikulturno uređenje škarpe, te sadnja mladih sadnica. Kompletan parking prostor ograđen je živom ogradom.

Proširenje parkinga u ulici Trg Grada Prato

U ulici Trg Grad Prato, u naselju Dobrinja V završeni su radovi na izgradnji i proširivanju parkinga. Radovi su izvršeni u okviru ugovora za izvođenje radova na sanaciji i proširivanju servisnih saobraćajnica sa izgradnjom parking površina na području Dobrinje. Novi parking prostor imat će ukupno 13 mjesta. U dijelu ulice koji povezuje unutrašnjost parkinga izvršeno je proširivanje saobraćajnice, čime je osigurano normalno odvijanje saobraćaja.



Dodatnih 60 mjesta za parkiranje u Brčanskoj ulici na Otoci

Stanovnici Brčanske ulice, u naselju Otoka dobili su dodatnih 60 parking mjesta, nakon što je završeno proširenje postojećeg parkinga koji je ranije imao 70 mjesta za parkiranje. Stanovnici ove ulice imali su problema u funkcionisanju saobraćaja zbog uskog prostora za kretanje vozila, ali i nepropisnog parkiranja, pogotovo je to otežavalo pristup vozilu hitne pomoći, vatrogasnim vozilima i vozilima za odvoz otpada.

Nakon tih radova izvršeno je uređenje zelene površine oko novoprosirenog parkinga. U sklopu tih radova uređeni su škarpa i travnjak, te zasađene sadnice Platana, Jasena i Bora.



Obnovljeni šetalište i biciklistička staza od mosta kod dvorane "Vistafon" do Otoke

Završeno je popločavanje šetnice uz Bulevar Meše Selimovića, od mosta kod dvorane "Vistafon" do Otoke. Prije ovih radova asfaltirana je biciklistička staza. Sanacija šetnice i biciklističke staze uslijedila je nakon što je KJKP "Vodovod i kanalizacija" završilo rekonstrukciju distributivne vodovodne mreže. Radove na sanaciji i rekonstrukciji šetališta finansirala je Općina Novi Grad Sarajevo.







Uspostava pješačkih zona u naseljima Dobrinja i Alipašino Polje

Nakon završetka radova na Dobrinji kroz koje je uspostavljena pješačka zona duž Bulevara branilaca Dobrinje i promijenjen režim saobraćaja koji je djelimično zadržan u toku radnog vremena - radnim danima, započeli su radovi i na Alipašinom Polju, čijom realizacijom će od kretanja i parkiranja automobila biti zaštićene pješačke zone.

Trenutno se radovi izvode u A i C fazi Alipašino Polja, a uskoro očekujemo početak radova i u B - fazi. U B i C fazi će također biti promijenjen režim saobraćaja uvođenjem jednosmjernog kretanja na pojedinim dijelovima naselja, koje neće biti vremenski ograničeno, ali će u većem dijelu prostora namijenjenog za kretanje pješaka biti fizički onemogućeno i kretanje automobila.

Po završetku ovih radova, odvajanjem zona saobraćaja i parkiranja od zona za pješake, djecu, i rekreaciju svih generacija, moći će se početi sa uljepšavanjem i uređivanjem sadržaja, poput popločanja postavljanja parkovskog mobilijara, hortikulture i sličnih sadržaja, koji će promijeniti i uljepšati izgled naših naselja.





Nakon peticije građana smanjene cijene korištenja garažnih mjesta na Saraj-Polju




Nakon peticije koja je provedena od 07. 06. do 08. 07. putem mjesnih zajednica Dobrinja A, B, C, D, i Saraj-Polje, prilikom čega je prikupljeno više od pet hiljada potpisa, kojima se tražilo smanjenje cijena zakupa gornjih etaža na garažama na Saraj-Polju i Dobrinji te nakon sastanaka održanih sa premijerom KS Edinom Fortom i ministrom komunalne infrastrukture Enverom Hadžiahmetovićem, Vlada Kantona Sarajevo donijela je Odluku kojom se smanjuju cijene korištenja gornjih etaža sa 40 na 20 KM i garažnih mjesta sa 60 na 50 KM.

Na ovaj način više od 1.000 mjesta na gornjim etažama trebalo bi brzo biti stavljeno u funkciju, a time znatno smanjene gužve unutar naseljskih parkinga, koji su uglavnom preopterećeni velikim brojem automobila.



Osim toga, u funkciji je i novi režim sa potapajućim stubićima na Bulevaru branilaca Dobrinje, gdje je kretanje automobila onemogućeno radnim danima poslije 17:00 sati i vikendom. U toku radnog vremena, radnim danima od 06:00 do 17:00 sati, automobili se i dalje mogu kretati i zadržavati unutar Bulevara, što je režim koji će se zadržati u narednom periodu, a sve do potpunog uređenja Bulevara kao pješačke zone.





Nakon rekonstrukcije i proširenja ulice Džemala Bijedića zasađeni drvoređi stabala s obje strane saobraćajnice

Više od dvjesto i pedeset stabala listopadnog i četinarskog drveća zasađeno je sa obje strane novoizgrađene dionice ulice Džemala Bijedića.

Hortikulturno uređenje uslijedilo je nakon što je završena rekonstrukcija i proširenje oko kilometar ove saobraćajnice, sa dvije na četiri kolovozne trake, izgradnja pješačkih staza i kružnog toka kod ulaza u Bingo centar.

Prilikom rekonstrukcije saobraćajnice bilo je neophodno ukloniti veći dio stabala, tako da sada ovaj dio ulice krasiti dvostruko više stabala nego što ih je bilo prije rekonstrukcije i proširenja saobraćajnice.

Saobraćajnica je obogaćena stablima Graba, Bagrema, Jasena i Tuja, te ukrasnog Borā i Javora, kao i žive ograde, ukrasnog grmlja. U sklopu ovih radova izvršit će se i uređenje unutrašnjosti kružnog toka.

Također, u narednom periodu sve glavne saobraćajnice bit će oplemenjene novim drvećem, dopunom na mjestima gdje nedostaju, kao i sadnjom novih stabala na mjestima gdje ih nema, kako bi novogradska naselja bila ljepša i ugodnija za življenje, sa što više zelenila.



Završena rekonstrukcija gornjeg dijela ulice Adema Buče





Završena je rekonstrukcija gornjeg dijela ulice Adema Buće, dužine oko jednog kilometra u naselju Buča Potok.

Rekonstrukcijom je urađena kompletna oborinska kanalizacija sa priključcima, te su na mjestima gdje je bilo potrebno izrađeni potporni zidovi sa potrebnim drenažama sa donje strane ceste. Saobraćajnica je po prvi put dobila pješačku stazu, a u sklopu projekta zamijenjene su telekomunikacijske instalacije, postavljene zaštitne ograde, horizontalna i vertikalna signalizacija, te je izgrađeno i autobusko stajalište.

Ovom ulicom se odvija javni gradski prevoz, vrši odvoz otpada prema gradskoj deponiji, a njezinom obnovom olakšana je komunikacija za veliki broj stanovnika, koji je svakodnevno koriste.

Prilikom rekonstrukcije ulice Adema Buće koja je rađena 2013. i 2014. godine, sanacija ovog dijela ulice nije se mogla raditi zbog nemogućnosti odvodnje oborinskih voda i nepostojanja kolektora. Nakon što je prošle godine izgrađena separativna kanalizaciona mreža u ulici Smaila Šikala stekli su se uslovi za sanaciju i preostalog dijela ulice Adema Buće.

Radove na rekonstrukciji ulice finansirala je Direkcija za puteve Kantona Sarajevo, dok je

Općina Novi Grad Sarajevo, prema sporazumu sa Direkcijom, implementirala projekat.





REKONSTRUKCIJA I PROŠIRIVANJE SAOBRAĆAJNICA OD KANTONALNOG ZNAČAJA

Novi asfalt u glavnoj ulici kroz naselje Dobroševići



Općina Novi Grad Sarajevo i Direkcija za puteve Kantona Sarajevo realizirale su projekat rekonstrukcije i proširivanja Ahatovičke ulice, u naselju Dobroševići, koja ima status regionalne ceste i alternativna je veza sa općinom Ilijaš preko Bioče, a kojom se odvija javni gradski prevoz.

U ovoj ulici po prvi put su izgrađeni trotoari za pješake. Amer Karičić iz Direkcije za puteve KS naglasio je zajedničku saradnju Općine Novi Grad Sarajevo i Direkcije za puteve KS, koja rezultira višemilionskim zajedničkim ulaganjima u cestovnu infrastrukturu u Novom Gradu.

„U ulici Ahatovička urađena je rekonstrukcija i sanacija ceste do spoja sa ulicom Dobroševićka, a vrijednost projekta je 440.000 KM, ostatak ceste će se raditi u narednom periodu. Trenutno Općina vrši eksproprijaciju zemljišta. Ahatovička je bila u jako lošem stanju i ovo je definitivno saobraćajnica koja je od zanačaja za Kanton“ ,istakao je Karičić.



Rekonstruisana glavna saobraćajnica u naselju Zabrdë

U naselju Zabrdë završena je rekonstrukcija i sanacija ulice Avde Palića, glavne saobraćajnice u ovom naselju, kojom se odvija javni gradski prevoz. Saobraćajnica je od izuzetnog značaja za ovo gusto naseljeno područje općine Novi Grad Sarajevo, bila je značajno oštećena, zbog saobraćanja kamiona prema gradskoj deponiji i kao takva predstavljala je veliki problem za odvijanje javnog gradskog saobraćaja. Naročito je bio oštećen gornji dio ulice, gdje je u prethodnim godinama urađena temeljita rekonstrukcija oko 1.400 metara saobraćajnice.

Izgrađeno je i novo autobusko stajalište, s obzirom na to da je stajalište ranije bilo u samoj raskrsnici ulica Porodice Šehić i

Avde Palića, čime je bila ugrožena sigurnost građana koji koriste gradski prevoz.

Projekt rekonstrukcije još 950 metara ulice Avde Palića u vrijednosti od 1.080.000 KM zajednički finansiraju Općina Novi Grad i Direkcija za puteve KS, a implementator projekta je Općina Novi Grad. Osim saobraćajnice u punom profilu sa dvije saobraćajne trake i pješačkom stazom, u ovoj ulici prvi put je urađena i oborinska odvodnja.

Prije rekonstrukcije saobraćajnice Općina je izvršila rekonstrukciju vodovodne mreže, u šta je uloženo oko 600.000 KM, a osim vodovodnih zamijenjene su i gasne i druge instalacije.





Proširen ulaz u Naselje heroja Sokolje



Proširivanjem ulaza u Naselje heroja Sokolje i ulice Numa - paše Čuprilića, gdje je urađeno proširenje saobraćajnice, sa trećom isključnom saobraćajnom trakom i trotoarom za pješake, značajno su poboljšani uslovi saobraćajne komunikacije u ovom gusto naseljenom dijelu Novog Grada.

Saobraćajnica je proširena i asfaltirana nakon što je završen proces eksproprijacije zemljišta za potrebe proširenja ulaza u Naselje, te izgradnja oborinske i otpadne kanalizacione mreže i nove vodovodne mreže, potpornih zidova i pješačke staze. Postavljene su horizontalna i vertikalna saobraćajna signalizacija, te je saobraćajnica dobila sasvim novi izgled i funkcionalnost. Ovim projektom osigurani su uslovi za bezbjednije kretanje pješaka, ali i nesmetano saobraćanje vozila kroz naselje.

Zadnjih desetak godina stanovnici ovog naselja imali su konstantne probleme, ulaz u glavnu naseljsku saobraćajnicu, ulicu Numan - paše Čuprilića iz ulice Safeta Zajke bio je uzak i nepristupačan, kao i sama ulica, te su se vozila, a posebno vozila javnog gradskog



prevoza, teško mimoilazila, nije bilo ni prostora za kretanje pješaka. Osim toga, u ovoj ulici nije bila riješena odvodnja oborinskih voda, vodovodna mreža bila je dotrajala zbog čega je često dolazilo do kvarova, te je voda curila niz ulicu što je uzrokovalo oštećenja na cesti.

Zbog svega navedenog pristupilo se izgradnji nove vodovodne i kanalizacione mreže i rješavanja imovinskih odnosa, a potom izgradnji potpuno nove saobraćajnice u punom profilu.

Općina je u proteklim godinama sanirala jedan dio vodovodnih instalacija, a ostatak dužine od oko 500 metara planiran je za ovu godinu, urađena je i rekonstrukcija i proširivanje gornjeg dijela glavne saobraćajnice, sa trotoarom, a u sklopu tih radova uklonjeni su postojeći i izgrađeni novi potporni zidovi.

U narednom periodu bit će nastavljene radovi na rekonstrukciji preostalog dijela saobraćajnice dužine oko 600 metara, za šta su u budžetu Općine planirana sredstva od 450.000 KM

Nakon izgradnje nove vodovodne mreže, asfaltirana ulica Atifa i Muradifa Omerspahića u Buča Potoku

Završeno je asfaltiranje ulice Adema i Muradifa Omerspahića u naselju Buča Potok, gdje je u protekloj godini urađena nova distributivna vodovodna mreža i izvršeno priključenje domaćinstava na novoizgrađenu mrežu. U sklopu tih radova položeno je oko 500 metara cjevovoda, na koji je priključeno oko 50 stambenih objekata, gdje su ranije često pucale cijevi i dolazilo je do prekida u snabdijevanju vodom. Zbog toga je i ulica bila u lošem stanju, te je bilo neophodno uraditi potpunu rekonstrukciju ceste.

Ovom investicijom Općina Novi Grad Sarajevo rješava dugogodišnje probleme stanovnika ovog dijela MZ "Dolac" kada su u pitanju snabdijevanje pitkom vodom i poboljšanje saobraćajne komunikacije, a smanjit će se i gubici vode.

Pored ove ulice planirano je da preduzeće KJKP "ViK" u ovoj godini

kroz program realizacije sredstava iz EBRD kredita izvrši zamjenu vodovodne mreže u još pet novogradskih ulica, gdje često dolazi do kvarova, nakon čega će Općina izvršiti asfaltiranje tih ulica.

Programom sanacije i rekonstrukcije lokalnih i nekategorisanih cesta u ovoj godini planirano je asfaltiranje 25 ulica ili dijelova ulica širom naše općine, a usvojena je i rezervna lista od 15 ulica čija sanacija će se raditi u slučaju ostvarivanja ušteda na drugim budžetskim pozicijama.

U ovoj godini bit će nastavljena rekonstrukcija i proširivanja ulice Rasima Turkušića, u naselju Švrakino Selo, kojom se odvija javni gradski prevoz, a gdje je u prošloj godini asfaltirano 300 metara saobraćajnice.



Potpisan ugovor za sanaciju 15 ulica i projektovanje nove vodovodne mreže u ulici Ferida Srnje u Švrakinom Selu



Načelnik Općine Novi Grad Sarajevo Semir Efendić potpisao je dva ugovora za izvođenje radova na sanaciji i rekonstrukciji 15 ulica na području općine Novi Grad Sarajevo, i projektovanje nove distributivne vodovodne mreže u ulici Ferida Srnje u Švrakinom Selu.

Ugovor za izvođenje radova na sanaciji i rekonstrukciji lokalnih cesta na području općine Novi Grad načelnik Efendić potpisao je sa Bedrijom Hodžić, direktoricom firme „Orman“, koja će izvoditi radove.

Ovo prilikom načelnik je kazao da Općina Novi Grad Sarajevo svake godine izdvaja oko 1,5 miliona KM za investiciono, redovno i zimsko održavanje cesta. Za radove kada je u pitanju investiciono održavanje godišnje se izdvaja oko milion konvertibilnih maraka. Ta sredstva budu podijeljena u dva LOT-a, a prvi će obuhvatiti 15 ulica na području općine Novi Grad, u 11 mjesnih zajednica. Vrijednost radova je 547.291,84 KM.

Radi se o lokalnim saobraćajnicama u naseljima od Ahatovića, Buća Potoka, do Švrakina Sela i Dobrinje. Iz godine u godinu sve više ulica dobija novi asfalt i time se uslovi života u tim ulicama značajno popravljaju.

Izrada Idejnog i Glavnog projekta za izgradnju vodovodne mreže u ulici Ferida Srnje

Ugovor za izradu Idejnog i Glavnog projekta distributivne vodovodne mreže u ulici Ferida Srnje u naselju Švrakino Selo načelnik Semir Efendić potpisao je sa direktorom firme „Entazis Konsalting“ Almirom Selimovićem.

„Ovaj ugovor je upravo vezan za projektovanje nove vodovodne mreže u ulici Ferida Srnje u naselju Švrakino Selo, gdje je ovog ljeta dolazilo više od deset puta do pucanja cijevi na improviziranom vodovodu koji koristi tridesetak objekata. Kroz ovaj ugovor pribavit ćemo projektnu dokumentaciju za izgradnju distributivnog vodovodnog sistema za dio ulice i vjerujem da ćemo već u narednoj godini imati pripremljenu projektnu dokumentaciju za izgradnju oko 1.100 metara vodovodne mreže“, kazao je načelnik Efendić.



ulica Vladimira Preloga



**Spoj ulica
Sehidska i Doljanska**



Vladimira Preloga



Vrandučka



Mehmeda Arapčića



Prvi put asfaltirana ulica Adnana Žunića u Brijuni, riješena i površinska odvodnja



Stanovnici ulice Adnana Žunića, u MZ „Brijuni“ dobili su po prvi put asfalt ispred svojih kuća i riješenu površinsku odvodnju koja im je niz godina predstavljala problem.

Zamjena kolovozne konstrukcije uslijedila je nakon što je izgrađena kompletna površinska odvodnja dužine 360 metara.

Odvodnja se radila od spoja sa ulicom Safeta Zajke do spoja ulice Adnana Žunića i u kompletnoj dužini ulice Adnana Žunića. U sklopu radova izvršena je zamjena kompletnog makadamskog kolovoza tamponskom podlogom, postavljeni su ivičnjaci i rešetke za odvodnju, nakon čega je ulica asfaltirana. Radove je izvodila firma “MGBH d.o.o. Sarajevo”. Vrijednost radova je oko 95.000 KM.



Rekonstrukcija i proširenje ulice Rasima Turkušića u naselju Švrakino Selo



U naselju Švrakino Selo završavaju se radovi na rekonstrukciji i proširivanju dijela ulice Rasima Turkušića, gde je kroz dvije godine izvršena rekonstrukcija i značajno proširenje ulice u dužini od oko 600 metara sa izgradnjom oborinske odvodnje. Ovom ulicom odvija se javni gradski prevoz minibuskom linijom Otoka - Turkušići i jedan je od prilaza Parku šume Mojnilo. Osim proširenja ceste, riješene su površinske vode, urađena drenaža, postavljeni ivičnjaci i asfaltiran kolovoz.

Asfaltirana ulica Ragiba Džinde

Završena je sanacija i asfaltiranje ulice Ragiba Džinde na području mjesne zajednice „Alipašin Most I“. Ulica je bila potpuno blokirana jer je bila neupotreblija zbog oštećenja na asfaltu.

Jedan dio ulice je zbog kvara na vodovodnoj i kanalizacionoj mreži bio potpuno blokirana, voda je isprala cijeli donji sloj asfalta te je ulica bila neupotreblija za saobraćaj. Nakon sanacije ulica je ponovo u funkciji.



U Naselju heroja Sokolje gradi se sportsko - rekreacioni centar "Zlatno polje"



U toku završne pripreme za postavljanje umjetne trave

Načelnik Općine Novi Grad Sarajevo Semir Efendić, sa saradnicima i izvođačem radova, obišao je lokaciju na kojoj se gradi sportsko - rekreacioni centar "Zlatno polje" u Naselju heroja Sokolje, gdje su u toku završne pripreme za postavljanje umjetne trave, a ove godine u budžetu su planirana sredstva u iznosu od 440.000 KM.


Načelnik Efendić kazao je da je planiran jedan sportski teren sa umjetnom travom koji će imati rasvjetu i tribine. "To je ono što očekujemo da će biti završeno u ovoj godini. Jedan dio sportskih sadržaja naravno razvijat ćemo već od sljedeće godine u skladu sa finansijskim mogućnostima. Dobili smo jedan veliki ravni teren od 8.000 kvadrata. Sokolje je kao naselje gusto naseljeno, nije imalo nikakvih ni sportskih, ni dječijih igrališta, osim jednog malog dječijeg igrališta. Zaista će ovi sadržaji puno značiti stanovnicima ovog naselja", kazao je Efendić.

Pored terena sa umjetnom travom SRC će imati još jednu univerzalnu sportsku plohu za druge sportove sa plastičnom podlogom za odbojku, košarku i ostale sportove. Pored toga bit će jedna staza oko cijelog kompleksa sa "tartan" podlogom za trčanje. U drugoj fazi planiran je jedan objekat u kojem bi se nalazile svlačionice i fitness centar sa kafeterijom.

Općina Novi Grad Sarajevo ima potrebu i kontinuirano radi na izgradnji dječijih igrališta unutar naselja. Trenutno se rade projektovanja za nekoliko dječijih i sportskih igrališta, koji će biti u planu kroz budžet Općine Novi Grad Sarajevo za narednu godinu. Jedno od njih gradit će se u Boljakovom Potoku, kao i u drugim naseljima širom Novogradske općine.



Čišćenje korita i obala Miljacke nizvodno od željezničkog mosta u Telalovom Polju



Nakon što se u prethodnom periodu radilo na uređenju i čišćenju korita i obala Miljacke, od Tržnog centra "Wisa" do željeznog mosta u Bačićima, i dalje nizvodno od mosta, Općina Novi Grad Sarajevo i ove je godine nastavila realizaciju projekta značajnog za prevenciju nastanka poplava.

Radovi se izvode na lokalitetu donjeg Telalovog Polja, od željezničkog mosta nizvodno prema ušću u rijeku Bosnu, gdje je vodotok vrlo zapušten, a obale zarasle šibljem i drugim rastinjem, a korito zatrpano šutom i drugim otpadnim materijalom.

S obzirom na to da je u ovom dijelu rijeke korito suženo i značajno smanjen proticajni profil, bilo je neophodno uraditi njegovo pročišćavanje, ali i čišćenje obala rijeke. Time će se vodotok vratiti u granice regulisanog korita i osigurati bolji protok vode, što će spriječiti izlivanje rijeke iz korita, a samim tim i plavljenje okolnog područja.

Nova i obnovljena dječija igrališta na Dobrinji, Otoci i u Buča Potoku

Na radost mnogobrojnih mališana i njihovih roditelja, u naseljima Buča Potok i Otoka obnovljena su dva dječija igrališta i upotpunjena novim rekvizitima za djecu, a potpuno novo dječije igralište izgrađeno je u ulici Trg Sarajevske olimpijade na Dobrinji.

Igralište u MZ "Dobrinja D"

Na prostoru mjesne zajednice „Dobrinja D“, u ulici Trg Sarajevske olimpijade, na prostoru s desne obale rijeke Dobrinje izgrađeno je novo dječije igralište.

Stanovnici dijela Dobrinje između rijeke Dobrinje i ulice Želimira Vidovića - Kelija imali su problem sa nedostatkom igrališta za najmlađu djecu, jer na ovom potezu, osim sportskih, nije bilo ni jedno dječije igralište.

Općina Novi Grad Sarajevo je izdvojila finansijska sredstva, izradila projektnu dokumentaciju, te završila izgradnju dječijeg igrališta na ovom lokalitetu. Igralište je izgrađeno na lokaciji, gdje je nekada postojalo dječije igralište, na zelenoj rekreacionoj površini uz rijeku Dobrinju. Roditelji, nane i dede mogu odmoriti na parkovskim klupama dok se djeca igraju. Mobilijar je prilagođen djeci najmlađeg uzrasta kao i starijoj djeci uzrasta do 12 godina.

Igralište u ulici Adema Buće

Igralište u ulici Adema Buće, potpuno je rekonstruisano i značajno prošireno, te obogaćeno novim sadržajima za djecu. Urađene su pristupne staze, nova ploha sa antistres gumenom podlogom, te je igralište prilagođeno i djeci najmlađeg uzrasta. Osim toga, uz postojeće rekvizite djeci je sad na raspolaganju i nova kula sa mostom i toboganima, a postavljene su i nove parkovske klupe i korpe za otpatke, te je cijeli prostor ograđen.

Igralište kod obdaništa "Dunje" na Otoci

Obnovljeno je i dječije igralište, u ulici Brčanska kod obdaništa "Dunje" na Otoci.

Igralište je u cjelosti obnovljeno, postavljena je antistres gumena podloga, kao i mobilijara za djecu najmlađeg uzrasta. Upotpunjeno je kulom sa toboganom i njihalicama, tako da je uređen prostor i za najmlađu djecu, što je nedostajalo.





Dva nova vrtića otvorila vrata za 300 mališana



U vrtić "Vjeverica" upisano više od 200 djevojčica i dječaka

Na radost brojnih mališana i njihovih roditelja, od 1. septembra, počela su sa radom dva nova vrtića u općini Novi Grad Sarajevo, vrtić „Vjeverica“ u A fazi Alipašino Polja, i vrtić u sklopu škole „Umihana Čuvidina“ u naselju Boljakov Poto

Vrtić „Vjeverica“, otvorio je vrata za više od 200 mališana, i raspoređenih u devet odgojnih grupa. Njegova rekonstrukcija i obnova koštala je 2,1 milion KM. Jedno je od najboljih obdaništa u Kantonu Sarajevo i šire, sa najboljim uslovima za boravak djece. Nalazi se u posebno izolovanom dijelu naselja Alipašino Polje, sa dosta zelenila i dječijim igralištima.

Vrtić je postojao u prijeratnim godinama, ali se nakon rata nije koristio, jer je bio potpuno devastiran. Njegova obnova trajala je dugo, zbog imovinskih odnosa. Objekt je u vlasništvu Kantona Sarajevo, ali je aktivnosti oko njegove rekonstrukcije vodila Općina Novi Grad Sarajevo, dok je Ministarstvo obrazovanja finansijski podržalo realizaciju projekta. Obnovljeni vrtić dat je na upotrebu JU „Djeca Sarajeva“ 1. marta ove godine, na Dan nezavisnosti BiH. JU „Djeca Sarajeva“ provela je konkurs za upis djece.

Dječija graja i u vrtiću u sklopu škole „Umihana Čuvidina“

Dječijom grajom, ispunjeno je i prelijepo novoizgrađeno obdanište u sklopu škole „Umihana Čuvidina“, u kojem će svoja prva znanja i utiske o maloj školi sticati oko 100 djevojčica i dječaka. Obdanište je izgrađeno u sklopu objekta sportske dvorane, u sklopu kojeg su izgrađene i nove školske prostorije, ambulanta i drugi prateći sadržaji. Vrtić je Javnoj ustanovi „Djeca Sarajeva“ dat na upotrebu 16. decembra - na Dan Općine Novi Grad Sarajevo.

Stavljanjem u funkciju još dva dječija vrtića u Novogradskoj općini, značajno će roditeljima olakšati svakodnevni život, a mališani su dobili prostor za ugodan boravak i igru.

U Novogradskoj općini i ove školske godine najveći broj učenika upisanih u prvi razred OŠ

1.300 prvačića obradovano ruksacima sa komplet udžbenicima

Općina Novi Grad Sarajevo i ove školske godine ima najveći broj prvačića u Kantonu Sarajevo, ali i šire. U prvi razred osnovne škole u 15 škola na području općine Novi Grad Sarajevo upisano je 1.300 učenika. Za sve njih Općina je osigurala ruksake sa komplet udžbenicima.

Načelnik Općine Novi Grad Sarajevo Semir Efendić sa saradnicima je prisustvovao svečanom dočeku prvačića u OŠ "Džemaludin Čaušević" i "Fatima Gunić". On je prvačićima poželio sretan početak školovanja, a tom prilikom đacima su uručeni ruksaci sa komplet udžbenicima. To je mali doprinos lokalne zajednice učenicima i njihovim roditeljima, da lakše započnu novu školsku godinu.

U Osnovnu školu "Aleksa Šantić" i ove školske godine upisano je najviše prvačića - 142, a u OŠ "Osman Nuri Hadžić" 129 prvačića, dok je u OŠ "Čamil Sijarić" i "Skender Kulenović" ove školske godine upisan znatno veći broj prvačića u odnosu na prethodnih nekoliko godina.

Također, raduje činjenica i da je u šest, od 15 osnovnih škola na području općine Novi Grad, broj upisanih prvačića veći od stotinu, kao i da je ukupno u osnovne škole u Novogradskoj općini upisano 10.985 učenika.





100.000 KM za podršku školama u općini Novi Grad Sarajevo



Općina Novi Grad Sarajevo je i ove je godine iz budžeta izdvojila 100.000 KM za podršku osnovnim školama sa prostora Novog Grada. Grant je uglavnom usmjeren na tekuće održavanje školskih objekata, proširenje kapaciteta produženog boravka, obnovu dotrajalih toaleta, sanaciju oštećenog krova, zamjenu elektroinstalacija i radijatora, te za opremanje kabineta i obnovu rasvjete te druge hitne intervencije.

Načelnik Općine Semir Efendić je sa predstavnicima 13 osnovnih škola potpisao sporazum o zajedničkoj saradnji na realizaciji navedenih projekata. Tom prilikom kazao je da je bila zamisao da se taj grant troši za pomoć nastavnom procesu, ali obzirom da su škole, nažalost u lošem stanju i da Ministarstvo kao titular tih škola ne izdvaja nikakva sredstva za te objekte, najviše ovih sredstava ići će u sanaciju mokrih čvorova, sanaciju radijatora, rasvjete u školama i drugih projekata koji se tiču samog održavanja školskih objekata.

Obnova školskog toaleta i fiskulturne sale

Direktorica OŠ „Mehmedalija Mak Dizdar“ Samira Nukić istakla je da Općina iz godine u godinu izdvaja sredstva koja su im prijeko potrebna. „Naša škola će konkretno obnoviti toalet, znamo sami kakva je higijensko - epidemiološka situacija i

obnavljanje toaleta je u ovom trenutku jako važno. Ono što bih još željela da napomenem, je to da smo sretni što je Općina svojim budžetom također izdvojila sredstva od 80.000 KM za našu fiskulturnu salu.

Sanacija krova Osnovne škole „Meša Selimović“

Direktor Osnovne škole „Meša Selimović“, Hamdo Radonja istakao je značaj podrške Općine Novi Grad školama. „Svake godine kontinuirano Općina Novi Grad pomaže osnovnim i srednjim školama na području općine. Taj novac ćemo iskoristiti za sanaciju krova koji je dotrajao. Škola je izgrađena 1981. godine i od tog perioda do sada nije vršena rekonstrukcija, a u poslijeratnom periodu je djelimično rađena rekonstrukcija, a evo zahvaljujući Općini Novi Grad mi smo nedavno stolariju promijenili, a sada ćemo sanirati i krov. Jedinu kontinuiranu pomoć imamo od ove Općine, što se tiče održavanja objekta i aktivnosti za poboljšanje sekcija unutar škole“, rekao je Radonja.



Učenci OŠ "Mehmedalija Mak Dizdar" dobili novu fiskulturnu salu

Općina Novi Grad Sarajevo realizirala je projekat rekonstrukcije fiskulturne sale u Osnovnoj školi "Mehmedalija Mak Dizdar" na Otoci, koja nije obnavljana od 1994. godine i duži vremenski period u lošem je stanju.

Realizacijom ovog projekta učenicima i nastavnom osoblju omogućeni su bolji uslovi za rad, kvalitetnije održavanje nastave iz tjelesnog odgoja, ali i drugih sportskih aktivnosti.



Osnovna škola "Mehmedalija Mak Dizdar" počela je sa radom 1974. godine. Tada je važila za jednu od najpremljenijih i najuređenijih škola na području općine Novi Grad Sarajevo. Međutim, tokom agresije na našu zemlju, školska zgrada i oprema su devastirani, a obnova škole nakon ratnih razaranja počela je 1994. godine, kada je i sportska sala obnovljena.

Školu danas pohađa oko 500 učenica i učenika, sanacija sale za njih je veliki podstrek da se fizički aktiviraju s obzirom da su

djeca skoro dvije godine bila u svojim domovima, obavljajući školske zadatke sjedeći za računarima i laptopima, te da je fizička aktivnost jako bitna za njihov razvoj.

U okviru realizacije ovog projekta zamjenjena je stara, dotrajale i oštećene podloga od vinaz ploča i postavljanja je nove PVC sportska elastična podna obloga sa visokokvalitetnim karakteristikama, a shodno evropskim i ostalim standardima, koji važe za ovakve objekte. Također su se izvršili molersko farbarski radovi. Sanirana je i staklena stijena na istočnoj strani dvorane.

Vrijednost ugovorenih radova je 76.190,34 KM, finansira ih Općina Novi Grad Sarajevo.





Otvoren Centar za kulturu i edukaciju "Safet Zajko"



U Centru „Safet Zajko“, 2. oktobra, otvoren je Centar za kulturu i edukaciju. Otvaranjem Centra stanovnici Novogradske općine i Sarajeva, prvenstveno djeca i omladina, dobili su prostor gdje će moći na kvalitetan i kreativan način provoditi svoje slobodno vrijeme, te ga obogatiti kulturnim i umjetničkim programskim sadržajima.

Moderno opremljeni Centar raspolaže multimedijalnom salom za pozorišne predstave, izložbenim prostorom, bibliotekom, učionicama i prostorijama za različite radionice, kao i salom za prezentacije. U okviru Centra će djelovati i čitaona namijenjena prevashodno za studente s obzirom na blizinu studentskih domova.

Radionice koje su ranije djelovale u objektu Vile Hadžihalilovića na Dobrinji (klavir, violina i gitara, zatim dramska, foto&video, likovna radionica i mozgaonica), nastavile su rad u prostorijama novootvorenog Centra. Interes za pohađanje nekog od programa koje Centar nudi pokazalo je više od 500 prijavljenih, uglavnom učenika osnovnih škole. Svi programi su besplatni, a posebna pažnja posvećena je naprednim programima za talentirane učenike iz različitih predmeta.

Povodom svečanog otvaranja Centra, na otvorenoj bini održan



je muzički program u kojem su nastupili Sinan Alimanović, Zele Lipovača, Toni Janković, Latif Močević, Dunja Fazlić i voditelji muzičkih radionica Mirza i Nejra Kovač, a za ljubitelje književnosti, upriličena je književna večer i druženje sa akademikom Abdulahom Sidranom, koji danas obilježava svoj rođendan.

„Da imam čarobni štapić“ izložba likovnih radova polaznika predškolskih ustanova i učenika osnovnih škola



U prvoj sedmica mjeseca oktobra u cijelom svijetu obilježava se „Dječija nedjelja“. Tim povodom u saradnji sa Bošnjačkom zajednicom kulture „Preporod“ u Galeriji Općine Novi Grad Sarajevo otvorena je izložba o temi „Da imam čarobni štapić“, a čine je literarni i likovni radovi polaznika predškolskih ustanova i učenika osnovnih škola.

Profesorica dr. Almedina Čengić dugogodišnji je član žirija za literarne radove konkursa „Da imam čarobni štapić“. Ona je kazala kako je uživala u radovima koje su poslali učenici, mladi umjetnici, te ih predstavila kao našu budućnost. „Ono što oni govore, što misle, kada pročitate, imate volju da se borite, da se dokazujete i da njima stvarate neko novo i ljepše vrijeme“, kazala je Čengić.

Profesor. dr. Sanjin Kodrić, predsjednik Bošnjačke zajednice kulture „Preporod“, kazao je da je Bošnjačka zajednica kulture „Preporod“ najstarija temeljna ustanova kulture Bošnjaka. Osnovana je davne 1903. godine, te se od tada pa do danas posebno se brine i skrbi za ono što je oblast obrazovanja, a sve u skladu sa multietičnim, multikulturnim i interkulturalnim karakterom Bosne i Hercegovine.

Dodao je da tome svjedoči i ovaj projekat likovnih i literarnih radova učenika osnovnih škola, kao i polaznika predškolskih ustanova u Bosni i Hercegovini, koji postoji već punih 19 godina, kroz koji je prošlo hiljade učenika iz cijele Bosne i Hercegovine.





„Tragom divljih orhideja“, izložba fotografija autorice Ermane Lagumdžija



„Tragom divljih orhideja“ naziv je izložbe autorice Ermane Lagumdžija, više kustosice Zemaljskog muzeja Bosne i Hercegovine, koja je bila otvorena u galeriji Općine Novi Grad Sarajevo od 19. augusta do 1. septembra ove godine.

Izložba prezentira jedinstvenost i biološku raznovrsnost autohtonih (divljih) vrsta orhideja u vaskularnoj flori ugroženosti i potrebe zaštite, kao i njihov značaj u očuvanju biodiverziteta na globalnom nivou. Kulturna simbolika orhideja govori o tome da orhideje simboliziraju rijetku i delikatnu ljepotu, te održavaju kulturni identitet pojedinih zemalja, zbog čega su u mnogima dobile status „nacionalnog cvijeta“.

Autorica izložbe Ermana Lagumdžija istakla je da ni jedan cvijet u historiji nije izazvao takvu pažnju i takav interes kao cvijet orhideje.

„Orhideje su kosmopoliti, oni su stanovnici cijele planete. Naseljavaju sva staništa izuzev pustinja, čak i na Arktiku ima sedam vrsta orhideja. To je jedna od najmlađih biljnih porodica, njena starost procjenjuje se na 20 do 30 miliona godina, međutim, nedavnim



nalazom jedne vrste pčele u Engleskoj, dokazano je da su one daleko starije“, pojasnila je Lagumdžija, ističući da je na krilima te pčele bio polen jedne vrste orhideje sa Kariba, te da je genetskim istraživanjem dokazano da su one još starije, otprilike 78 do 84 miliona godina.

Od endemičnih vrsta orhideja, ističe Lagumdžija, Bosna i Hercegovina ima samo jednu, te da su uglavnom sve ostale orhideje prilagodljive na svim staništima, od submediteranskih kamenjara, do visokoplaninskih staništa.

Izložba "Oprostorena intima Atelje: Enterijer i eksterijer iz kolekcije Umjetničke galerije BiH"



Izložba „Oprostorena intima Atelje - Enterijer i eksterijer iz kolekcije Umjetničke galerije BiH“ bila je postavljena u Galeriji Općine Novi Grad Sarajevo.

Stalna postavka pod nazivom „Oprostorena intima - enterijer i eksterijer iz kolekcije Umjetničke galerije BiH“ proteklih pet godina krasila je zidove u Umjetničkoj galeriji BiH. Sastojala se od pet segmenata - Bašta / Enterijer / Atelje / Prozor / Pejzaž - kroz koje su predstavljene lični pogledi umjetnika na određene prostore kroz djela koja se nalaze u kolekciji. U Galeriji Općine Novi Grad Sarajevo 2017. godine predstavljen je segment izložbe „Bašta“, dok su ovom prilikom posjetitelji mogli vidjeti i segment ateljea.

Maja Abdomerović, viša kustosica Umjetničke galerije Bosne i Hercegovine istakla je da ova institucija kulture već godinama predstavlja djela iz svoje kolekcije u Galeriji Općine Novi Grad Sarajevo. „Ovoga puta smo se odlučili da predstavimo dio stalne postavke koja je zatvorena u junu ove godine, i zamijenjena je novom. Ostali su dijelovi te kolekcije koje smo smatrali, sada u ovom trenutku interesantnim da predstavimo i ovdje u Općini Novi Grad. Osim umjetničkih djela bh. umjetnika, izložena su i djela vrlo značajnih regionalnih umjetnika kao što su Mario Mikulić, Antun Šojata, Milan Četić, Vlado Marjanović, Atanasije Popović, Emanuel Vidović, Mica Todorović, Edin Numankadić, Sead Musić, Vojislav Todorović, Gabrijel Jurkić, Vlaho Bukovac, Pero Popović, Nedeljko Gvozdenović i Luka Šeremet“, istakla je Abdomerović.



Izložba fotografija “Alija Izetbegović, prijatelji i saradnici”



U Galeriji Općine Novi Grad Sarajevo, 4. augusta je otvorena izložba fotografija „Alija Izetbegović, prijatelji i saradnici“, a organizirala ju je Javna ustanova Muzej “Alija Izetbegović” u saradnji sa Općinom Novi Grad Sarajevo.

Na izložbi koja se mogla pogledati do 17. augusta, predstavljene su fotografije susreta prvog predsjednika Predsjedništva Republike Bosne i Hercegovine sa mnogobrojnim ličnostima iz javnog i političkog života, sa humanistima, umjetnicima, sportistima, muzičarima i drugim ljudima sa kojima je održavao privatne i poslovne kontakte.

Pored same izložbe posjetioци su imali priliku da po promotivnim cijenama kupe neka od izdanja izdavačke djelatnosti rahmetli Alije Izetbegovića.

Direktorica Berberović - Dizdarević istakla je da se ovom izložbom simbolično obilježava datum rođenja rahmetli Alije Izetbegovića, prvog predsjednika nezavisne Republike Bosne i Hercegovine, koji



je rođen 8. augusta 1925. godine u Bosanskom Šamcu. „Ono što je specifično za ovu izložbu je što se radi o materijalu, odnosno fotografijama koje su preuzete iz privatnog albuma predsjednika Izetbegovića i arhive Muzeja “Alija Izetbegović”, pojasnila je Berberović - Dizdarević.

Istakla je da je u današnjem kontekstu, kada ljudi pokušavaju da ocrne lik, ličnost i djelo Alije Izetbegovića, jako bitno da podsjećamo na to koliki je bio njegov značaj u historijskom i političkom kontekstu, ali i u kontekstu velikog mislioca i filozofa, borca za ljudska prava i slobode.

Heroj oslobodilačkog rata Ramiz Salčin dao je sebe za državu Bosnu i Hercegovinu



Još jedna tužna godišnjica pogibije Ramiza Salčina, ratnog komandanta Teritorijalne odbrane Općine Novi Grad Sarajevo, dobitnika najvećeg ratnog priznanja "Zlatni ljiljan" i ordena oslobodilačkog rata "Zlatni grb sa mačevima", obilježena je uz vojne počasti Drugog rendžerskog pješadijskog puka Oružanih snaga Bosne i Hercegovine.

Na mjestu na kojem je prije 29 godina poginuo rahmetli Ramiz Salčin, cvijeće su položili članovi njegove porodice, prijatelji, delegacija Općine Novi Grad i Općinskog vijeća Novi Grad Sarajevo, izvršne i zakonodavne vlasti sa federalnog i kantonalnog nivoa, brojna boračka udruženja, Savjet MZ "Saraj-Polje" i političke partije.

Rahmetli Ramiz dao je veliki doprinos u organiziranju otpora na početku agresije na RBiH. Ne postoji ratište na području Novogradske općine, od bitke na Žuči, Mojmilu, Dobrinji, pa do Nedžarića, odnosno Saraj-Polja, gdje je i poginuo, a da taj hrabri patriota nije bio prisutan. Poginuo je od snajperskog hica ispaljenog s agresorskih položaja iz pravca Nedžarića.


Jedan od saboraca rahmetli Ramiza Salčina, Muhamed Mujezinović je rekao kako je Ramiz nesebično davao sebe za ovu državu, kako nije gledao šta će biti, hoće li dobiti nešto od toga, hoće li mu se šta priznati, za razliku od onih koji gledaju samo sebe, Ramiz je davao sebe za Bosnu i Hercegovinu, kazao je saborac Mujezinović. Istakao je također kako ga boli činjenica da niko ne pominje da je prva oslobođena teritorija na Zuči bila pod komandom rahmetli Ramiza Salčina.

Ramiza Salčina i njemu slične neustrašive borce, kakvih je bilo mnogo tokom agresije na BiH, Bosanci i Hercegovci nikada ne smiju zaboraviti.

Izložba fotografija o liku i djelu Ramiza Salčina

Povodom obilježavanja 29. godišnjice od pogibije heroja oslobodilačkog rata Ramiza Salčina, u holu ispred multimedijalne sale, 23. augusta, bila je postavljena izložba fotografija o liku i djelu rahmetli Ramiza Salčina, komandanta TO Novi Grad Sarajevo i brigadira Armije RBiH.

Nizom izložbenih panoa, predstavljena je njegova biografija, od rođenja, privatnog i porodičnog života, do učešća u organiziranju otpora agresoru na prostoru općine Novi Grad Sarajevo, s posebnim akcentom na doprinos učešća u Armiji RBiH, gdje se dokazao kao heroj odbrane grada Sarajeva i Bosne i Hercegovine.





27. Memorijalni turnir „Ramiz Salčin“



U povodu obilježavanja 29. godišnjice pogibije Ramiza Salčina, komandanta Štaba TO Novi Grad Sarajevo, a u organizaciji Sportskog kluba osoba s invaliditetom Novi Grad, u OŠ „Aleksa Šantić“, održan je 27. Memorijalni turnir “Ramiz Salčin” u streljaštvu i pikadu za osobe sa invaliditetom na kojem je učestvovalo više od 70 sportista u ženskoj i muškoj konkurenciji.

Bila je to manifestacija ugodnog druženja i prisjećanja na lik i djelo rahmetli Ramiza Salčina, koji je poginuo 22. augusta 1992. godine na Vojničkom Polju, braneći grad i državu BiH od agresora.

U streljaštvu u kategoriji muškaraca, ekipno prvo mjesto osvojili su strijelci SIK Tuzla, drugo SK OSI Banovići, a treće mjesto pripalo je ekipi OSI Tešanj. Rekord turnira i strelišta, postigao je Hajro Bečić iz Banovića sa 187 krugova. Drugi je Mirsad Hasić iz Tuzle sa 180, a treći Šaban Fatić iz Sarajeva sa 179 krugova.

U konkurenciji žene, najbolje su bile predstavnice SK OSI Tešanj sa 343 kruga, a slijede ih SK OSI Živinice sa 337 i SK SIK Tuzla sa 325 krugova.

U disciplini pikado prvo mjesto osvojila je ekipa Tešnja, drugo Vogošća, a treće Novi Grad Sarajevo. U pojedinačnom plasmanu najbolje su bile: Mirela Ramić, Hedija Efendić i Hasna Hamzić.

Pokrovitelji takmičenja bili su Općina Novi Grad Sarajevo i BH Telecom - direkcija Sarajevo.



29. godišnjica masakra na trgu ZAVNOBiH-a

Agresorske granate ubile šest građana, od kojih troje djece



Dvadesetog septembra, obilježena je 29. godišnjica masakra na Trgu ZAVNOBiH-a kod brojeva 10 i 12, u naselju Alipašino Polje. Granatama ispaljenim sa agresorskih položaja vojske Republike Srpske, iz pravca Nedžarića, ubijeno je šest građana, od kojih troje djece. Najstarije dijete imalo je petnaest, a najmlađe sedam godina.

Polaganjem cvijeća na spomen-obilježju i učenjem Fatihe, članovi porodica i prijatelji ubijenih, delegacije Općine Novi Grad Sarajevo, Općinskog vijeća, Udruženja roditelja ubijene djece opkoljenog Sarajeva 1992–1995., Savjet Mjesne zajednice "Alipašino Polje B-II" su odale počast ubijenim sugrađanima. Počast ubijenim sugrađanima su odali i učenici Osnovne škole "Fatima Gunić".

U masakru su ubijeni: Samir (Omer) Ibrahimagić (1983-1992.), Enes (Velija) Muharemović (1985-1992.), Adnan (Suljo) Mušanović (1977-1992.), Zoran (Arsen) Drndelić (1949-1992.) i Rasim (Sulejman) Šaškić (1941-1992.).



NA OVOJ
SRPSKI ZLO
30. 5. 1992
GRABANA S
RATNIKOV
I BICNA
PROUCES
I FOZ
KICE SE
KAZN
OVOJ

MIR
MISA

TONA SA

ME GRAD SARAJEVO



Sjećanje na 11 sugrađana ubijenih na Alipašinom Polju, čekajući u redu za hljeb

Delegacija Općine Novi Grad Sarajevo položila je, 30. augusta, cvijeće na mjesto masakra na Trgu solidarnosti do broja 14, na Alipašinom Polju, mjestu gdje je prije 29 godina granata ispaljena sa položaja vojske Republike Srpske, usmrtila 11 i ranila 53 civila, dok su čekali u redu za hljeb.

Tog kobnog dana ubijeni su Rifet Bahtić, Jasmin Đozo, Muniba Ganija, Nermin Gušić, Zoran Kafedžić, Sadrija Krasnići, Nadežda Puljić, Daniel Turkalj, Edin Uzunović i dvije neidentifikovane osobe.

Na mjesto masakra cvijeće su položili i članovi porodica, prijatelji i komšije ubijenih, delegacije Općine Novi Grad Sarajevo, Grada Sarajevo i Kantona Sarajevo, te predstavnici Savjeta MZ "Alipašino Polje A-1", Unije civilnih žrtava rata KS - a, kao i građani i predstavnici političkih partija.

Ovo je bio prvi od tri stravična masakra na Alipašinom Polju, koje je počinila agresorska vojska Republike Srpske tokom opsade Sarajeva. Nakon ovog ubijanja nevinih civila, u novembru 1993. godine sa položaja vojske RS ispaljena je granata kojom su ubijeni učiteljica Fatima Gunić i njeni učenici na Trgu ZAVNOBiH-a, a godinu poslije počinjen je masakr u kojem je agresorska granata usmrtila djecu na sankanju u Bosanskoj ulici.





Godišnjica deblokade Dobrinje

U organizaciji Udruženja JOB "Unija veterana" Novi Grad Sarajevo, 2. septembra, obilježena je 29. godišnjica deblokade Dobrinje. Tim povodom delegacije Općine Novi Grad Sarajevo, Općinskog vijeća, boračkih udruženja, porodice poginulih, te predstavnici političkih partija, položili su cvijeće na spomen - obilježju na Trgu djece Dobrinje, prisjećajući se onih koji su herojski poginuli braneći ovo herojsko naselje 2. septembra 1992. godine.

Više od stotinu dana naselje Dobrinja je bilo potpuno odsječeno od grada. Tokom 1992. godine odvijale su se borbe za odbranu ovog naselja, koje je za srpsko-crnogorskog agresora imalo izuzetan geostrategijski značaj, a u neposrednoj blizini u tadašnjoj kasarni, početkom 1992. godine bilo je stacionirano mnogo vojne tehnike, naoružanja, municije, kao i vojnika JNA i dobrovoljaca iz Srbije i Crne Gore. Okupljanje veterana rata sa Dobrinje, predstavnika Općine Novi Grad Sarajevo, boračkih udruženja, političkih partija, učenika Osnovne škole "Osman Nuri Hadžić" i drugih, bilo je jasna poruka da se nikada ne smiju zaboraviti oni koji su živote dali za odbranu grada i države od agresora.



Obilježena 29. godišnjica od pogibije devet sugrađana u naselju Boljakov Potok

Dvadesetosmog septembra 1992. godine, u naselju Boljakov Potok, ubijeno je devet građana, prilikom obavljanja dženaze i ukopa sugrađanke Fatime Jusić, granatom ispaljenom sa položaja vojske Republike Srpske iz pravca Nedžarića.

Polaganjem cvijeća na spomen-obilježju i učenjem Fatihe članovi porodica i prijatelji ubijenih, delegacije Općine Novi Grad Sarajevo i Općinskog vijeća Novi Grad Sarajevo, predstavnici Udruženja civilnih žrtava rata, političkih partija odali su počast sugrađanima, koji su tog 28. septembra izgubili živote dok su klanjali dženazu sugrađanki Fatimi Jusić. Na

dženazi se tog dana okupilo oko 200 ljudi, a sa agresorskih položaja ispaljene su dvije granate od čijeg je dejstva devet osoba ubijeno, a 20 je teže i lakše ranjeno. Ubijenim su počast odali i delegacije Grada Sarajeva i Kanton Sarajevo.

Behija Dević u ovom masakru izgubila je jedinog brata, svake godine sa svojim sestrama dolazi na obilježavanje godišnjice. „Sve je isto, tuga uvijek ista, s tim moramo živjeti“, kratko je kazala Dević.

Predsjedavajući Općinskog vijeća Novi Grad Sarajevo Mirza Selimbegović naglasio je kako ne smijemo zaboraviti ratna

dešavanja i kako treba da se okrenemo budućnosti u svakom slučaju, te je dodao da je poenta ovih obilježavanja da se mladi ljudi upoznaju sa onim čemu su stariji od njih svjedočili.

Od agresorske granate živote su izgubili Asim Cvrk, Meho Čakarić, Alija Čaušević, Imšir Kerla, Mustafa Karajčić, Ibrahim Šehović, Ramo Veljan, te dva još uvijek neidentifikovana muškarca.



Simbolična pomoć od Općine Novi Grad Sarajevo za još 51 porodicu sa blizancima, troje i više djece

Općina Novi Grad Sarajevo već sedmu godinu iz budžeta izdvaja sredstva za podršku porodicama koje dobiju blizance, treće i svako naredno dijete, a do sada je podršku od po 500 KM dobilo više od hiljadu porodica s područja Novog Grada, koje su se opredijele da imaju više djece.

U zgradi Općine upriličen je prijem i uručenje rješenja za dodjelu simbolične pomoći za još 51 porodicu, 28 porodica dobilo je treće, devet porodica četvrto dijete, dok je dvanaest porodica dobilo blizance, jedna porodica osmo dijete, te jedna porodica trojke.

Među njima je i mladi bračni par Azra i Mirnes Bojić, koji su u maju ove godine postali roditelji trojkama, djevojčici i dvojici dječaka.. Njihov dolazak na svijet donio je dodatnu radost u njihov dom.

Azra ističe zadovoljstvo brigom lokalne zajednice o višečlanim porodicama i natalitetu. „Ovo je za mene velika pomoć, to nama mnogo znači, jer su zaista veliki troškovi kada je u pitanju dohrana, pampers itd. Zahvalila bih se mnogo načelniku Općine Semiru Efendiću, na ovoj pomoći i podršci, te bih poručila da nastavi sa ovim projektom, jer zaista mnogo znači“, kazala je Bojić.

Naida Baždarević, dobila je blizance. Istakla je da joj je ova pomoć od strane Općine Novi Grad Sarajevo jako značajna. „Ja imam

blizance, ali mi je drago što i ovi sa trojkama, četvorkama dobijaju pomoć, jer je ovo stvarno jaka podrška“, rekla je Baždarević.

Pomoćnik općinskog načelnika za boračka pitanja, rad, socijalna pitanja i zdravstvo Tajib Delalić najavio je i određene novine u izmjeni Pravilnika o dodjeli jednokratne novčane pomoći porodiljama sa područja općine Novi Grad Sarajevo, za rođenje blizanaca, trećeg i svakog narednog djeteta.

„Dosadašnja praksa je bila da porodilja za rođenje blizanaca, trećeg i svakog narednog djeteta dobiva 500 KM, dok je izmjenama Pravilnika utvrđeno da visina jednokratne novčane pomoći iznosi po 500 KM za svako novorođeno dijete, u slučajevima kada se radi o blizancima ili trojkama. Tako će porodilja za rođenje blizanaca dobiti po 500 KM za svako novorođeno dijete, odnosno ukupno 1.000 KM, dok će porodilja za rođenje trojki dobiti 1.500 KM“, kazao je Delalić.



Nakon požara u stambenom objektu u Buča Potoku porodice koje su ostale bez krova nad glavom smještene u objektu ŽIŠ-a

Porodice čiji su stambeni objekti izgorjeli u požaru, 20. augusta, u ulici Nusreta Prohića, u naselju Buča Potok, brzom intervencijom Službe civilne zaštite Općine Novi Grad Sarajevo, a u saradnji sa drugim ustanovama, istog dana smještene su u objekat Željezničkog školskog centra u Buča Potoku.

Bez krova nad glavom ostalo je deset porodica, sa 30 članova, od kojih je osmero djece. Nakon što su porodice smještene, započela je aktivnost prikupljanja pomoći za njih. U saradnji sa Javnom ustanovom Studentski centar osigurana je i hrana, a uz podršku građana koji su iskazali želju da pomognu, osigurani su i odjeća, obuća i druge potrepštine. U saradnji sa Domom zdravlja "Novi Grad" porodicama je pružena i medicinska pomoć, ljekarski pregled i neophodni lijekovi.

Općina Novi Grad Sarajevo preuzela je brigu o ljudima koji su ostali bez krova nad glavom, i finansirat će troškove komunalija, struje, vode, plina, interneta, kablovske tv, odvoza smeća, ali i isporuke hrane. U narednom periodu radit će se na procjeni štete nastale usljed požara i procjeni troškova obnove objekata uništenih u požaru ili eventualne izgradnje novih, u saradnji sa Kantonom i Gradom Sarajevo, koji su obećali pomoć.







Općina Novi Grad Sarajevo





Balladorn
SALON CENTRAL

Advertisement signs on a building in the background.



Općina Novi Grad Sarajevo

ČESTITAMO
DAN DRŽAVNOSTI
BOSNE I HERCEGOVINE